

1 CORINTIOS

San Pablopa K'art'a Naapiara P'ãda Corinto P'uurudepema Ijãapataarãmaa

San Pablo, Jesucristopa jirit'eradapa na k'art'a p'ãji, Éfeso p'uurude bak'ãri. P'ã pëiji Corinto p'uurudepema ijãapataarãmaa. Pablo Jesucristo ùraa jaratee nipak'ãri judio-eerã t'ãide Corinto p'uurude, mãirã ùk'uru Cristode ijãa p'aneejida. Corinto p'uuru waibia baji Grecia eujãde. Mama eujã k'ïra t'ãdoodepa net'aa aneedap'edaa netopachida. Ichiaba mama p'anapachida awaraa ak'õre waibia apatade ijãapataarã k'ïra t'ãdoo. Maperã Cristode ijãapataarã nepira k'ïra t'ãdoode baaipachida. Pablopa na k'art'a p'ãji ãra ùraait'ee, jïp'a Jesucristode ijãapataadamerã; ãchi p'ek'au k'achia oo amaadamerã mãik'aapa chik'inia p'anapataadamerã Cristopa k'inia bik'a.

Naapiara Pablopa gracias jara bi Tachi Ak'õremaa ma Corintodepemaarã pari, Jesucristode wãara ijãapata perã (cap. 1.1-9). Mamïda t'ëepai ãra itria bi k'ïsia awara-awaraa p'anapata perã, chik'inia p'anada-ee (caps. 1.10-4.21). Ichiaba ãra itria bi ãchi t'ãide p'ek'au oopataarã ichiak'au bipata perã mãik'aapa charraarãmaa nepira atepata perã, t'ãri auk'a bidai k'ãyaara Cristopa k'inia bik'a (caps. 5-6). Jara bi sãga miak'ãi p'anirã p'anapataadaipia bi (cap. 7) mãik'aapa sãga p'anapataadaipia bi ijãadak'aa beerã ãchi ik'aawa p'anapataarã ome

(caps. 8.1–11.1). P'anau bi Corintodepemaarãpa iidi pëidap'edaa, k'awa k'inia p'anadak'ãri sãga oodaipia bi chip'edaidak'ãri it'aa t'ipataadait'ee (cap. 11.2-16). Ichiaba jara bi ijãapataarã nek'opatade Cristo piuda k'irãpadak'ãri (cap. 11.17-34); sãga p'anapata wãara chik'inia iru p'anapataarã (cap. 13) mãik'aapa Tachi Ak'õre Jaurepa ijãapataarãmaa ne-inaa oopiparide (caps. 12 y 14). Jara bi k'ãata jara k'inia bi Jesús piup'eda chok'ai p'irabaida irude ijãapataarã-it'ee (cap. 15). T'ëepai jara bi sãga p'arat'a p'edaipia bi awaraa ijãapataarã k'aripadait'ee mãik'aapa ichia k'ĩsia iru bi ooit'ee (cap. 16).

Salude pëida

¹ Mi, Pablo, tachi ipema Cristo k'aurepa Sóstenes ome na k'art'a p'ãruta. Tachi Ak'õrepa k'inia bada perã, mi jirit'eraji Jesucristopa pëimerã ichi ũraa jarateede.

² Mia na k'art'a p'ãru parã ijãapataarãmaa Corinto p'uurude p'ani. Parãpa Jesucristode ijãa p'aneedak'ãri, Tachi Ak'õrepa parã awara biji ichideerã p'aneedamerã. Mãga oopari jõmaweda na p'ek'au eujãdepemaarã ome, Jesucristomaa it'aa t'ĩdak'ãri. Mãgá Tachi Poro Waibia Jesucristo ãra Poro Waibia pai ichiaba.

³ Mia k'inia bi Tachi Ak'õrepa mãik'aapa Tachi Waibia Jesucristopa parã pia ak'i p'anadamerã. Mãgá k'ãiwee p'anapataadait'ee.

Tachi Ak'õrepa Cristode ijãapataarã pia ak'i bapari

4 Ichita Tachi Ak'õremaa it'aa t'ĩ bak'ãri parã pari, mia jarapari: “Ak'õre, pi t'ãri pia bi Jesucristode ijãapataarã pia ak'ipari perã.”

5 Cristode ijãa p'ani k'aurepa Tachi Ak'õrepa ne-inaa jõmaade parã Corinto pidaarã k'aripaji. Pia pedeeji iru ũraa jarateedamerã. Ichiaba poro wẽsaapiji k'awaadamerã irua oopi k'inia bi ichide ijãapataarãmaa.

6 Tachi Ak'õrepa mãga ooda perã, parãpa waapiara Cristode ijãajida, taipa naaweda jarateedap'edaa k'ãyaara.

7 Ma awara Tachi Ak'õrepa ma jõma ooda perã parã-it'ee, parãpa oodai ne-inaa jõmaweda iru Jau-repa oopi bik'a ichideerãmaa, Tachi Waibia Jesucristo cheit'ee ewari ni p'ani misa.

8 Tachi Ak'õrepa parã pia ak'i bapariit'ee Cristo cherumaa, ma ewate iru k'aurepa parã k'achia wẽe p'anadamerã.

9 Mãga ooit'ee ichia jaradak'a oopari perã. Parã jiriiji ichi Warra Jesucristo ome araa p'anapataadamerã.

Ijãapataarã k'ĩsia awara-awaraa p'anadap'edaa

10-11 Ma jara aupada jõmaweda wãara mĩda, Cloe tedepemaarãpa mimaa k'awapijida parã nepirade para bi, auk'a k'ĩsiada-e p'anadairã. Ipemaarã, Tachi Waibia Jesucristopa mi pẽida perã, jũriti mi ũraa! T'ãri auk'a p'anapatãati, aupedeeda-ee, Cristode ijãapata perã. Óoti irua oopi bik'a ichideerãmaa.

12 Nãga mimaa nepirijida. Ijãapataarã ũk'uruurãpa mãgapata: “Mi Pablo eere bi”; awaraarãpa: “Mi Apolo eere bi”; awaraarãpa:

“Mi Pedro eere bi”; jōdee apemaarāpa: “Mi Cristo eere bida” apata.

13 Cristopa ichide ijāapataarāmaa mǎgá awara-awaraa k'ĩsiapik'aa. Mi, Pablo kurusode piu-e paji parā pari, p'ek'au k'achia wēpapiit'ee. Parā poro choopidak'āri, mi t'ĩide poro chooda-e paji.

14 Mi o-ĩa bi Tachi Ak'õre k'ĩrapite parādepema Crispo mǎik'aapa Gayo aupai poro chooda perā.

15 Mǎgá mia chok'ara-ee poro chooda perā, parādepema apidaapa p'oyaa jarada-e mi t'ĩide poro choopiji.

16 Ichiaba Estéfanos te pidaarā poro chooji. Mǎgiirā awara mia waa k'irāpa-e.

17 Cristopa mi pēi-e paji poro choode. Jĩp'a ichia ooda mǎik'aapa ũraada jarateedeta pēiji. Mǎgí ũraa mia k'ĩsia k'awaa pik'a jaratee-e, ijāadamerā mi pedee wēsaa jaratee bipa. Ma k'āyaara t'āri pia jarateepari k'awaadamerā Jesucristo kurusode piuji eperāarā o k'achiadeepa k'aripa atait'ee.

Tachi Ak'õre jōmaarā k'āyaara k'ĩsia k'awaara bi

18 Mǎgí jarateeda maarepida ũri k'iniada-e p'ani Cristode ijāadak'aa beerāpa, āchi-it'ee mǎgí jarateepataarā pariatua pedee p'anadairā. Mamīda tachi ijāapataarāpa mǎgí jarateeda ũridak'āri, p'ek'au k'achia oo k'iniada-e p'anapata, k'awa p'anadairā Cristopata tachi ma o k'achiadeepa k'aripa atapari.

19 Mǎga k'awa p'ani Tachi Ak'õre Ũraa p'ādade jara bairā:

‘Mia ak'ipiit'ee na p'ek'au eujādepema k'ĩsia k'awaa beerāda apata wāara mǎga p'ani-e, āchia

k'ĩsia iru p'anik'a mia oopi-e pak'ãri.' (Is
29.14)

20 Tachi Ak'õrepa mǎgí p'ǎdade nǎga jara k'inia bi. Eperǎarǎ ĩrapemaarǎk'a, poro wēsaa p'ani jida mǎik'aapa pedee wēsaa pedee p'ani jida, k'ĩsia k'awada-ee pik'a p'ani Tachi Ak'õre k'ĩrapite, iru jõmaarǎ k'ǎyaara k'ĩsia k'awaara bapari perǎ.

21 Tachi Ak'õre mǎga bapari perǎ, na p'ek'au eujǎdepemaarǎpa iru p'oyaa k'awada-e āchi k'ĩsiadoopa. Maperǎpi Tachi Ak'õrepa Cristopa ooda eperǎarǎ k'aripait'ee taimaa jarateepiji, ũk'uruurǎpa k'ĩsia p'ani mīda tai k'ĩsia k'awada-ee p'ani. Mamīda chi ijǎarutaarǎ taipa jarateepatade o k'achiadeepa uchiadait'ee.

22 Judiorǎpa taipa jarateepata ũri k'iniada-e p'ani, ak'i k'inia p'anadairǎ ne-inaa Tachi Ak'õrepa ooru eperǎarǎpa p'oyaa oodak'aa. Jõdee judioeerǎpa ũri k'iniada-e p'ani, k'ĩsia k'awaa bīpa jarateedata jiri p'anadairǎ.

23 Mamīda táipata jarateepata Cristo kurusode piuda p'ek'au k'achia wēpapiit'ee, judiorǎpa ijǎadaamaa p'ani pijida mǎik'aapa judioeerǎpa ichiaba ijǎa k'iniada-e p'ani pijida, tachi k'ĩsiadeepa pariatua jarateedai jǎak'aapa.

24 Taipa mǎga jarateepata k'awa p'anadairǎ Tachi Ak'õrepa jirīmaa bi judiorǎ mǎik'aapa judioeerǎ paara Cristode ijǎadamerǎ. Irude ijǎadak'ãri, k'awa p'aneepata iruata k'awapipari Tachi Ak'õrepa k'ĩsia iru bi mǎik'aapa oopipari Ak'õrepa oopi k'inia bik'a eperǎarǎmaa.

25 Tachi Ak'õrepa mǎga k'ĩsia iru bajī na p'ek'au eujǎdepemaarǎpa k'ĩsia p'ani mīda irua ne-inaa

pariatua ooji Cristo piupik'ãri. Tachi Ak'õrepa Cristo peedap'edaarã ome p'oyaa-e pajida apata. Mamĩda irua mãga oopik'ãri, ak'ipiji ichi wãara jõmaarã k'ãyaara k'ĩsia k'awaara bapari mãik'aapa ak'ipiji ne-inaa jõma p'oyaa, mãgá tachi o k'achiadeepa k'aripa atada perã.

Tachi Ak'õrepa eperãarã jirit'erada

²⁶ Ipemaarã Cristo k'aurepa, k'ĩsiati parã p'anapatap'edaade, Tachi Ak'õrepa parã jirii naaweda. Parã t'ãide Tachi Ak'õrepa eperãarã jirik'ãri ichide ijãadamerã, chok'ara jiri-e paji nãgee: k'ĩsia k'awaa beerã na p'ek'au eujãdepemaarãpa jiripatak'a; p'arat'ara beerã maa-e pirã eperãarã poro waibiarã.

²⁷ Mãgeerã jirit'erai k'ãyaara, Tachi Ak'õrepa jirit'eraji eperãarã mak'iaara k'ĩsia k'awada-ee beerã, na p'ek'au eujãdepema k'ĩsia k'awaa beerã k'ĩra nejasia p'aneedamerã ũridak'ãri irua jarapida mãirãmaa. Ichiaba jirit'eraji eperã jip'aarã, na p'ek'au eujãdepema poro waibiarã k'ĩra nejasia p'aneedamerã ũridak'ãri irua oopi bi mãirãmaa.

²⁸ Jirit'eraji na p'ek'au eujãdepema eperãarã chupiria beerãda apata. Mãga ooji ak'ipiit'ee pipiara bi Cristode ijãaru, k'ĩsia k'awaa bai k'ãyaara, p'arat'ara bai k'ãyaara mãik'aapa eperã waibia bai k'ãyaara.

²⁹ Mãga ooji Tachi Ak'õrepa, apida audua p'ananaadamerã ichi k'ĩrapite.

³⁰ Tachi Ak'õre jõmaarã k'ãyaara k'ĩsia k'awaara bapari perã, tachimaa k'awaapiji Cristopa ooda tachi k'aripait'ee atuanaadamerã. Cristopa tachi neto pik'a ataji uchiadamerã p'ek'au k'achia jua

ek'ariipa. Māpai irude ijāadak'āri, Tachi Ak'ōrepa tachi awara biji araa p'anapataadamerā iru ome. Māgá p'ek'au k'achia wēe p'aneejida Tachi Ak'ōre k'īrapite. Ma awara māgá Cristopa tachimaa k'awapiji Tachi Ak'ōrepa oopi k'inia bi.

³¹ Maperāpi Tachi Ak'ōre Ūraa p'ādade jara bi: 'Eperāpa jara k'inia bi pirā ichiata ne-inaa k'awaara bi awaraarā k'āyaara, māga jaraipia bi ichia k'awaa bairā Tachi Ak'ōrepa iru pia ak'i bapari.' *(Jer 9.23-24)*

2

K'īsia k'awaa bīpa ichi k'īradoopa apida Cristode ijāapi-e pai

¹ Ipemaarā, mi parāmaa wāk'āri, jarateeji Tachi Ak'ōrepa jara pēida; irua naaweda k'īsia iru bada ooit'ee Cristo piuda k'ap'ia. Māga jaratee-e paji poro wēsaa bīpa jarateeparik'a maa-e pirā k'īsia k'awaa bīpa jarateeparik'a.

² Ma k'āyaara jarateeji Jesucristo kurusode piuda tachi p'ek'au k'achia wēpapiit'ee.

³ Māga jaratee bide mi p'era baji, parāpa mia jararu ūri k'iniada-e pai jīak'aapa.

⁴ Jaratee-e paji k'īsia k'awaa bīpa jarateeparik'a, ichi pedee ijāadamerā. Māga-e. Tachi Ak'ōre Jaurepata mia jarateeda parāmaa ijāapiji, ichia jōmaweda p'oyaapari perā.

⁵ Ak'ōre Jaurepa māga ooji parāpa k'īsianaadamerā eperāpa jarateeda k'aurepa ijāa p'ani. Jīp'a ijāa p'ani Tachi Ak'ōre Jaurepata ijāapida perā.

Tachi Ak'ōre Jaurepata k'awapipari ichia k'īsia iru bi

⁶ Taipa parãmaa jarateeda-e paji k'ĩsia k'awaa beerãpa jarateepatak'a. Mamĩda mǎgá jarateepata Tachi Ak'õre pipiara k'awa k'inia p'anĩrãmaa. Jarateedak'aa ijãadak'aa beerã k'ĩsia k'awaa beerãk'a maa-e pirã ijãadak'aa beerã waibiarãk'a. Æchi piudak'ãri, Æchia jarateedap'edaa mak'iaara k'irãpadak'aa.

⁷ Æchia jarateepatak'a jarateedai k'ãyaara, taipa jarateepachida Tachi Ak'õrepa k'awapida taimaa; ai naaweda ne-inaa eperãarãmaa k'awapi-e pada. K'awapiji ichia k'ĩsia iru bada ooit'ee Jesucristo k'ap'ia pari na eujã ooi naaweda. Ichiaba k'awapiji jõma ichia k'ĩsia iru bi tachi-it'ee, it'ari panadak'ãri.

⁸ Tachi Ak'õrepa ichia k'ĩsia iru bada k'awapi-e paji eperã waibia beerãmaa, mǎgĩrãpa ijãada-e pada perã. Æchia mǎga k'awadap'edaa paara, Tachi Waibia kurusode peeda-e pak'aji. K'awak'ajida iru cheji Tachi Ak'õre k'ĩra wãree unupide na p'ek'au eujãdepemaarãmaa.

⁹ Ma awara tachia k'awa p'ani Tachi Ak'õrepa mǎgĩrãmaa k'awapi-e paji ichia k'ĩsia iru bi ichide ijãapataarã-it'ee, iru ũraa p'ãdade jara bairã:

'Tachi Ak'õrepa nǎgĩ ne-inaa k'ĩsia iru bi teeit'ee ichi k'inia iru p'anĩrãmaa: ne-inaa eperãarãpa waide unudak'aa; waide ũridak'aa; mǎik'aapa waide k'ĩsiadak'aa.' (Is 64.4)

¹⁰ Chonaarãweda Tachi Ak'õre ũraa p'ãdak'ãri, k'awada-e p'anapachida irua k'ĩsia iru bada. Mamĩda Tachi Ak'õre Jaurepa ne-inaa jõma k'awapari perã, mǎgĩ k'ĩsia paara tachimaa

k'awapii.

11 Eperāpa ichi k'ĩsia k'awapari ichi t'āridepai. Māga pik'a Tachi Ak'õre Jaurepa k'awapari Tachi Ak'õre k'ĩsia.

12 Mapa tachi ijāapataarāpa Ak'õrede ijāadak'aarāpa k'ĩsiapatak'a k'ĩsiadak'aa. Tachi Ak'õrepa ichi Jaure pēiji tachimaa k'awapimerā ne-inaa jōma irua ooit'ee bi tachi-it'ee Jesucristo k'ap'ia pari. Ak'õrepa māga oo-e paji tachia ne-inaa pia oopata perā. Jīp'a ooji tachi k'inia iru bapari perā.

13 Maperā taipa jarateedak'aa tachi k'ĩsiadoopa. Jīp'a Tachi Ak'õre Jaurepa jarateepi bik'a jarateepata. Māga ūridak'āri, ijāapataarāpa k'awaa wāpata Tachi Ak'õrepa k'ĩsia iru bi āchi-it'ee, ichi Jaure āchi ome bapari perā.

14 Mamīda ijāadak'aa beerāpa māga ūri k'iniadak'aa, āchi-it'ee tachi k'ĩsiadoopa pariatua pedee p'anadairā. Ma awara āchia Tachi Ak'õre k'ĩsia p'oyaa k'awadak'aa, Tachi Ak'õre Jaure wēe p'anapata perā.

15 Tachi Ak'õre Jaure iru p'anirāpa ne-inaa jōma ak'idai k'awaadait'ee pia wa k'achia Tachi Ak'õre k'ĩrapite. Māga oodai Ak'õre Jaurepa āra k'aripapari perā. Jōdee Tachi Ak'õre Jaure wēe beerāpa māgá p'oyaa ooda-e. Ma awara āchia p'oyaa k'awada-e p'ani Tachi Ak'õre Jaure tachi ijāapataarā ome bapari wa māga-e, iru Jaure wēe p'anadairā.

16 Tachia k'awa p'ani ijāadak'aa beerāpa Tachi Ak'õre net'aa p'oyaa k'awadak'aa, iru Ūraa p'ādade jara bairā:

‘¿K'aipa k'awaaima Tachi Ak'õre k'ĩsia mãik'aapa
k'aipa iru ũraaima? Iruata ne-inaa jõma
k'awapari.’ *(Is 40.13)*

Mamĩda m̃ga-e tachi ijãapataarã ome. Tachiata
k'awaadai Tachi Ak'õre k'ĩsia, iru Jaurepa tachi
k'ĩsiapari perã Cristopa k'ĩsia bik'a.

3

*Tachi Ak'õre Ũraa jarateepataarã auk'a mimiap-
ata iru-it'ee*

¹ Ipemaarã, k'irãpáti mia jaratee nipada parã
ome bak'ãri. Ara nawepa ichi warra chai ewaa
t'odamaa chik'o k'opi-e bik'a, chik'o waide
p'oyaa k'o-e bairã, m̃ga pik'a mia jaratee-
e paji Tachi Ak'õre Jaure taarã iru beerãmaa
jarateeparik'a. M̃ga oo-e paji parã at'ãri pia
ijãada-e p'anadap'edaa perã.

² Maperãpi nawepa ichi warra chai jutopi-
parik'a chik'o waide p'oyaa k'o-e bairã, m̃ga pik'a
mia jĩp'a jarateepachi Cristo piuda eperãarãpa
p'ek'au k'achia oopata wẽpapiit'ee. Jaratee-e paji
jõma irua k'ĩsia iru bi tachi-it'ee, k'awa bada perã
parãpa waide m̃ga p'oyaa k'awada-e pai.

³ M̃ga p'ani pãchia oo k'iniata oo p'anadairã,
Tachi Ak'õre Jaurepa oopi k'inia bi ooda-ee. Iru
Jaurepa jarateepi bik'a oodai k'ãyaara, aupedeep-
ata, Tachi Ak'õrepa jarateepataarã pẽida audú k'ia
p'anadairã.

⁴ ¿Jara p'ani-ek'ã: “Mi Pablo eere bi” maa-e pirã
“Mi Apolo eere bi”? ¡Parã ijãadak'arãk'api k'ĩsia
p'ani!

5 Mi, Pablo Apolo ome eperäärã poro waibiaraã-epi; jĩp'a Tachi Ak'õre mimia oopataarã, parãmaa jarateedap'edaa Cristode ijãadamerã. Taipa Cristopa oopidak'a jarateejida.

6 Eperãpa ichi eujãde ne-uuparik'a, mia naapiara parãmaa jaranaji Cristopa ooda eperäärã k'aripait'ee. Mãpai ne-uu ak'iparipa ooparik'a, Apolopa waapiara jarateepachi k'awaadamerã Tachi Ak'õrepa parãmaa oopi k'inia bi. Mamĩda Tachi Ak'õrepa ne-uu jõmaata waripiparik'a, iruata taipa jarateedap'edaa parãmaa ijãapiji.

7 Ne-uuparipa mãik'aapa ne-uu ak'iparipa ma ne-uuda p'oyaa waripidak'aa. Maperã ma ne-uuda waripipari ãra k'ãyaara waibiara bi. Mãga pik'a Tachi Ak'õre waibiara bi tai jarateepataarã k'ãyaara, irua aupaita eperäärãmaa ijãapipari perã.

8 Ma ne-uupari ma ne-uu ak'ipari ome auk'a mimiapachida chaumerã. Mãga pik'a tai mimiapataarãpa auk'a jarateepata eperäärãpa Tachi Ak'õrede ijãadamerã. Mamĩda Tachi Ak'õrepa tai chaachaa p'aait'ee ichia k'inia bik'a, taipa oodap'edaa pari.

9 Tai ma mimiapataarãk'ata p'ani. Jõdee parã ma ne-uudák'ata p'ani. Mamĩda Tachi Ak'õreta ma eujã chipari. Parã ijãapataarã ichiaba te choma pik'a bi; te Tachi Ak'õrepa oopimaa bi ichi mimiapataarãmaa.

10 Tachi Ak'õrepa k'inia bada perã, mi pëiji ma te choma ewaa oomerã. Maap'eda awaraarã mi t'ëe chejida ne-inaa awaraa parãmaa jarateede. Mamĩda pia jarateedaipia bi.

11 Mia mãga jara bi Tachi Ak'õrépata ichi Warra Jesucristo bida perã ma te choma te basak'a

bamerã. Irua aupaita tachi o k'achiadeepa k'aripa atai. Mapa apidaapa awaraa basa jiridaik'araa bi.

¹² Ma basade te oodai nãgí net'aa pi-ia bidee: nēedee, p'arat'adee, wa mãu pi-iadee. Maa-e pirã ma te oodai pak'urudee, p'ũajara p'oo bidee wa siadee.

¹³ Mamĩda Ak'õre ewari waibia ewate irua ma te oopataarãpa oodap'edaa ak'iit'ee mãik'aapa jarait'ee pia wa k'achia. Pia jarait'eera, irua taipa oodap'edaa chaa mãik'aapa jarateedap'edaa chaa ak'iit'ee. Ma ewate ma ne-inaa jõmaweda t'ipitaude wãyaait'ee.

¹⁴ Cristopa taimaa oopida mãik'aapa jarateepida paa-e pait'ee. Chooit'ee. Tachi Ak'õrepa mãgí pia ak'iit'ee mãik'aapa mãgí pari teeit'ee ichia k'ĩsia iru bi teeit'ee Cristopa oopidak'a oodap'edaarãmaa.

¹⁵ Mamĩda eperãarãpa ãchi k'ĩsiadoopa oodap'edaa maa-e pirã jarateedap'edaa jõma paait'ee wẽparumaa. Mamĩda net'aa ãt'a atadak'a t'ipitaudeepa, ma jarateepari atua-e pait'ee. Jĩp'a beeit'ee Tachi Ak'õre ome. Mamĩda Ak'õrepa ne-inaa teeit'ee pada ichimaa wẽe bait'ee.

Tachi Ak'õrede ijãapataarã iru ték'api p'ani

¹⁶ Tachi Ak'õre ichi te waibiade baparik'a, ichi Jaure bapari parã ome. Maperã parã iru ték'api p'ani.

¹⁷ Maperã apidaapa parãmaa ijãa amaapiruta pirã Cristode maa-e pirã oo amaapiruta pirã Cristopa parãmaa oopi k'inia bi, Tachi Ak'õrepa mãgí k'achia ooit'ee. Mãga ooit'ee, parã jirit'era atada perã ichi-it'ee, ichi te waibiak'a p'anadamerã.

Tachi Ak'õrepa k'inia bik'a p'anapataadaipia bi

18 Pãchi itu k'ũrapináati. Parãdepema apidaapa k'ĩsiadaik'araa bi ãchi k'ĩsia k'awaa p'ani na p'ek'au eujãdepema k'ĩsia k'awaa beerãk'a. Ma k'ãyaara k'ĩsia k'awa-ee pik'a p'anadaipia bi na eujãdepemaarã k'ĩrapite, Tachi Ak'õrepa ichi k'ĩsia parãmaa k'awapimerã.

19 Na p'ek'au eujãdepema k'ĩsia k'awaa beerãpa jaradak'ãri ãchia ne-inaa k'awa p'ani, Tachi Ak'õre-it'ee ãchi k'ĩsiadoopa pariatua pedeepata. Tachia mãga k'awa p'ani iru Ũraa p'ãdade jara bairã:

'Tachi Ak'õrepa k'awa bi na p'ek'au eujãdepema k'ĩsia k'awaa beerãpa k'ĩsia iru p'ani chãara k'ũradait'ee.' *(Job 5.13)*

20 Ichiaba iru Ũraa p'ãdade jara bi:

'Na p'ek'au eujãdepema k'ĩsia k'awaa beerãpa jõmaweda k'awa p'ani choo-e pait'ee.' *(Sal 94.11)*

21 Tachi Ak'õrepa mãga jara bairã, apida audua p'anadaik'araa bi k'ĩsia p'anadairã ãchi eerepema jarateeparita pipiara bi apemaarã jarateepataarã k'ãyaara. Jõmaarãpa parã auk'a k'aripapata, ma-it'ee Ak'õrepa ãra pëida perã parãmaa.

22 Irua mi, Pablo, Apolo mãik'aapa Pedro pëiji taipa Cristopa ooda jarateedamerã. Mãga ooji parã awaraa Cristode ijãpataarã ome pipiara p'anapataadamerã Cristopa k'inia bik'a. Tachi Ak'õrepa na p'ek'au eujã ooji tachi aide p'anapataadamerã. Tachi o k'achiadeepa k'aripa ataji it'aa wãdamerã jai-idaadak'ãri mãik'aapa pipiara p'anapataadamerã na eujãde p'ani misa.

23 Ma jōma ooji tachi-it'ee, tachi Cristodeerã perã mãik'aapa Cristo iru Warra perã.

4

Tachi Ak'õre Ūraa jarateepataarã ichiaba Cristo-it'ee mimiapata

1 Parãpa tai Cristo-it'ee mimiapataarãk'a iru p'anadaipia bi, iruata tai jarateede pëida perã Tachi Ak'õrepa k'ĩsia iru bada; ne-inaa eperãarãmaa naaweda jara-e pada.

2 Irua tai mǎgá pëida perã, chok'ek'ee p'anadaipia bi.

3 Parã maa-e pirã awaraarãpa mia ooda mãik'aapa jarateeda ak'i k'inia p'ani pirã k'awaadait'ee pia wa k'achia, ak'idaipia bi. Mia p'ua-e bi. Mamĩda michia pida mia ooda mǎgá ak'i-e bi.

4 Cristopa jarateepidak'a parã t'ãide jarateepachi perã, k'ĩsia p'ua-e bi Tachi Ak'õre k'ĩrapite. Mǎga jarak'ãri, jara k'inia-e mia maarepida ne-inaa k'achia ook'aa. Tachi Waibiapata mia oopata ak'iit'ee mãik'aapa jarait'ee pia wa k'achia.

5 Mǎgá mia ooda Cristopata ak'iit'ee perã, ¿sǎap'eda taipa oopata ak'i k'inia p'anima parãpa, Cristo cheit'ee ewate pai naaweda? Ma ewate ichiata k'awapiit'ee ne-inaa jōma eperãarãpa waide k'awada-e p'ani; ne-inaa eperãarãpa ãchi t'ãridepai k'ĩsia p'anadap'edaa paara, na p'ek'au eujãde nipadak'ãri. Maap'eda ne-inaa pia oodap'edaa pari teit'ee ichia k'ĩsia iru bi.

6 ĩpemaarã Cristo k'aurepa, ma jara aupadade k'ĩsiadak'ãri, k'awa p'ani mi Apolo ome ak'idaipia bi

Tachi Ak'õre Ũraa p'ãdade jara bik'a, pãchi k'ĩradoopa ak'idai k'ãyaara. Mia mãga jara bi parãpa pedee audua pedeenadamerã pãchi jarateepari ãpíte, pedee k'achia pedee p'ani misa awaraarã jarateepari ãpíte.

⁷ ¿K'aipa parã bijima chĩara ak'ipataarã? Tachi Ak'õrepata parã k'ĩsia k'awaapipari mãik'aapa ne-inaa oo k'awaapipari. Pãchi k'ĩradoopa mãga oodak'aa. Mãga bita, ¿sãap'eda audua pedee-atama?

⁸ Parã audua p'anadaik'araa bi. Mamĩda mãgã p'ani. Mi-it'ee parã p'arat'ara beerãk'ata p'ani, ne-inaa jõma iru p'anadairã; maarepida faltadee. Ma awara nãgaweda reyrãk'ata p'ani Cristo ome. Mapa iru jarateepataarãpa jarateeruta waa ũri k'iniadak'aa. ¡Taawa reyrãk'a p'anak'ajida, tai jida mãga p'anadait'ee auk'a!

⁹ Mamĩda mãga-e. Mi-it'ee Tachi Ak'õrepa tai, ichia jirit'eradaarã, ek'ariara papiji. Eperãarãpa awaraarã peedait'ee p'anik'a jõmaarã taide, mãga pik'a p'ani tai. Jõmaarãpa ak'i k'inia p'anapata jãgí eperãarã miapiruta. Mãga pik'a na p'ek'au eujãdepema jõmaarãpa tai chupiria jõni ak'ipata, angeleerãpa paara.

¹⁰ Tai k'ĩra k'awa-ee pik'a p'ani, Cristo-it'ee mimi-apata perã. Jõdee parã k'ĩsia k'awaara pik'a p'ani Cristode ijãa p'anida apata perã. Taipa mak'ĩara k'awada-e p'ani Tachi Ak'õrepa k'ĩsia iru bi, tai k'ĩsiadoopa k'ĩsia p'anadairã. Mamĩda parãpa jõmaweda k'awa p'anida apata. Jõmaarãpa parã k'inia iru p'ani, t'ãri pia p'anadairã. Jõdee tai k'ĩra unuamaa iru p'ani, jõmaarã ek'ariara p'anadairã.

¹¹ Taipa Tachi Ak'õre Ũraa jaratee

p'aneedak'ãriipa, mata at'ãri jarra oopata mãik'aapa opisia choopata; p'aru sore jĩpata. Ma awara ijãadak'aa beerãpa tai p'ua oopata. Te jida wẽe p'ani, awara ãi jarateede nipapata perã.

12 Tachi juadoopa mimiapata, ñida-ee. Awaraarãpa taimaa ik'achia jaradak'ãri, chõo jiridak'aa. Jĩp'a Tachi Ak'õremaa it'aa t'ĩpata ãchi pari. Tai jiridak'ãri miapidait'ee, taipa choopata.

13 Tai ãpĩte pedee k'achia jaradak'ãri, ãchimaa t'ãri pia pedeepata. Mamĩda tai k'ĩra unuamaa iru p'anapata. Æchi-it'ee tai ne-inaa mik'iak'a p'ani. Mãgá tai iru p'anajida. Mata at'ãri mãgá iru p'ani.

14 Ma et'ewa jarada p'ã-e paji parã k'ĩra nejasi-apiit'ee. Ũraait'eeta p'ãji ak'õrepa ichi warra k'inia iru bi ũraparik'a.

15 Mia mãga jara bi mi-it'ee parã mi warrarãk'a p'anadairã. Jarateepataarã chok'araarãpa jarateedai Cristopa parãmaa oopi k'inia bi. Mamĩda mia naapiara jarateenaji Cristo parã pari piuda. Mãgá irude ijãajida. Maperãpi mi parã ak'õrek'a bi.

16 Maperã oodaipia bi mia oo bik'a.

17 Mapa Timoteo pëiru parã k'aripanamerã. Iru mi warra k'iniak'a ichiaba, mia naapiara jarateeda perã Cristo iru pari piuda. Irua oopari Cristopa oopi bik'a. Mapa iru parãmaa pëiru, k'irãpapimerã mi sãga bapari Cristo jua ek'ari. Mia oopari Cristopa oopi bik'a mãik'aapa ijãapataarã para bee chaa jarateepari jõmaarãpa mãga oodamerã.

18 Parãdepema ũk'uru audua p'ani k'ĩsia p'anadairã mi waa parãmaa wã-e. Mamĩda mãga-e.

19 Ak'õrepa k'inia bi pirã, mak'ïara taarã-e jãmaa wãit'ee. Pak'ãri, mia k'awaait'ee mãgí audua beerãpa jara jõni. Mamïda ma k'ãyaara waapiara mia nãga k'awa k'inia bi. ¿Achia oo p'anik'ã wa ooda-e p'ani Cristopa oopi bik'a?

20 Parãpa k'awadaipia bi Cristode ijãa p'anida apataarãpa oodaipia bi irua oopi bik'a. Mãga oodak'ãri, ak'ipipata pedepapai ijãa k'iniada-e. Jip'a p'ana k'inia p'anapata Cristo jua ek'ari.

21 Mi parãmaa wãk'ãri, ¿k'ãata k'inia p'anima; itriamerã wa pedee sia pedeemerã?

5

K'ãata oodaipia bi pariatua p'ek'au oopataarã ome

1 Íra mia jarait'ee mïmaa nepiridap'edaa. Parã t'ãide abaapa ichi nawek'aa chi wërak'a iru bi. Ijãadak'aa beerãpa pida mãgee k'achia oodak'aa!

2 Mamïda parã at'ãri audua p'ani, k'ïsia p'anadairã Tachi Ak'õre Jaurepa oopi bik'a oo p'ani. Audua p'anadai k'ãyaara, k'ïsia p'ua p'anadaipia bi mãgí k'achia oomaa bairã parã ijãapataarã t'ãide. Ma eperã pãchi ik'aawaapa ãyaa pëidaipia bi.

3 Mi parã ome ba-e pait'ee mïda, mi k'ïsia parã ome bait'ee. Tachi Waibia Jesupa mïmaa k'awapiji k'ãata oodaipia bi ma eperã ome.

4 Mapa mi k'ïsia aupai bait'ee mïda parã ome, irua auk'a mãga k'awapiit'ee parãmaa chip'edaidak'ãri irumaa it'aa t'ïdait'ee.

5 Jõma ijãapataarã see nïbak'ãri, ma eperã pãchimãiipa ãyaa wãpíti, Satanapa iru k'ap'ia

k'achia ooyaa bi miapimerã maa-e pirã piupimerã. Mãgá Tachi Ak'õrepa iru jaure it'aa ateei Tachi Waibia Jesús cheit'ee ewate.

⁶ Audua p'anadaik'araa bi ma k'achia oomaa bi misa parã t'ãide. Jõmaarãpa nãgí pedee k'awa p'ani: "Levadura ma-ãriipa pan masa jõmaweda waridaipari."

⁷ Tai judiorãpa Pascua fiesta oodai naaweda, levadura jõmaweda iru p'ani tai tede bat'ak'oopata, ma fiestade pan levadura wëe k'odait'ee. Mãga pik'a parãpa p'ek'au k'achia jõmaweda unu p'ani parã t'ãide oo amaadaipia bi, k'achia wëe p'anadait'ee Tachi Ak'õrepa k'inia bik'a. Wãara parã p'ek'au k'achia wëe p'ani Tachi Ak'õre k'irapite, Cristo piuda perã pãchia p'ek'au k'achia oopata wëpapiit'ee. Pascua fiestadepema oveja chak'ek'a bi piuji Tachi Ak'õrepa tachi miapinaamerã tachia p'ek'au k'achia oopata k'aurepa.

⁸ Cristo mãgá piuda perã, p'anadáma irua oopi bik'a. Apidaapa k'achia oodaik'araa bi Cristode ijãadai naaweda oopatap'edaak'a. Ma k'ãyaara k'ira jip'a p'anapataadaipia bi mãik'aapa wãarata jarapataadaipia bi.

⁹ Mia naaweda k'art'a p'ãdade jaraji k'õp'ãyo meraanaadamerã wëraarã maa-e pirã imik'iraarã pariatua p'ek'au ooyaa beerã ome.

¹⁰ Mãga jarak'ãri, jara k'inia-e baji ãyaa p'aneedamerã nãgee ijãadak'aa beerã ik'aawaapa: pariatua p'ek'au oopataarã; p'arat'a waapiara iru p'ana k'inia p'anãrã; nechiapataarã maa-e pirã awaraa ak'õre waibia apatade ijãapataarã.

Mãgeerã ik'aawaapa ãyaa p'anedap'edaa paara, ichita uchiadait'ee paji na p'ek'au eujãdeepa.

11 Nãgí p'ãrupa mia jarait'ee k'ãata jara k'inia baji apema k'art'ade. K'õp'ãyo meraanáati ijãapataarãda apata mĩda, nãga oopataarã ome: pariatua p'ek'au ooyaa beerã; p'arat'a waapiara iru p'ana k'inia p'anirã; awaraa ak'õre waibia apatamaa it'aa t'ipataarã; awaraarã ãpite ik'achia jarapataarã; it'ua toyaa beerã maa-e pirã nechiapataarã ome. Mãgeerãmaa p'asianáati mãik'aapa pãchima chepináati. Nek'ode paara t'ũdaik'araa bi mãgeerã ome.

12-13 Mãga jara bi Tachi Ak'õrepa tachi bi-e pada perã ijãadak'aa beerãpa oo p'ani ak'idamerã. Ichiata mãirãpa oopatap'edaa ak'it'ee mãik'aapa ãchi miapiit'ee. Mamĩda tachia ak'idaipia bi awaraarãpa oo p'ani tachi ijãapataarã t'ãide, ijãadak'aa beerãk'a p'anaruta pirã. Maperãpi parãpa chi k'achia ooyaa beerã ãyaa wãpidaipia bi pãchi ik'aawaapa, Tachi Ak'õre Ũraa p'ãdade jara bik'a:

'Jëret'áati chi k'achia ooyaa beerã pãchi
ik'aawaapa.' (Dt 17.7)

6

Ijãapataarã nepirade p'anadak'ãri

1 Írá mia jarait'ee k'ãata oodaipia bi parã nepirade p'anadak'ãri. Parãdepema nepira iru bak'ãri awaraa ijãapari ome, ijãadak'aa beerã charraarãmaa wãik'araa bi. Ma k'ãyaara ijãapataarãmaa wãipia bi.

2 ¿Parãpa k'awada-e p'anik'ã tachi Cristo ome araa p'anirãpa iru pari ak'idait'ee ijãadak'aa beerãpa ne-inaa oopatap'edaa jaradait'ee pia wa k'achia? Mãga bita, ¿sãap'eda p'oyaa ak'ida-ema ijãapataarã nepira mak'ïara waibia-e bita parã t'ãide?

3 ¿K'awada-e p'anik'ã tachia ichiaba angeleerã ak'idait'ee? Mãga pirã, ¿irapema nepira pãchi pitapai ak'idai!

4 Mãgá parã awaraa ijãapataarã ome nepirade baaidak'ãri, charraarã ijãadak'aa beerãmaa wãdai k'ãyaara, wãdaipia bi charraarã ijãapataarãmaa.

5-6 Nãgí jararupa parã k'ïra nejasiapi k'inia bi. ¿Pia bik'ã chõopik'a para bait'ee pãchi pitapai, ma awara mãgee charraarã k'ïrapite wãdait'ee? ¿A-ida parãdepemapa ijãapataarã nepira p'oyaa ak'ida-ek'ã?

7 ¿Parã mãgá chõo pik'a para bairã, k'achia oomaa p'ani! Ma k'ãyaara piara bak'aji awaraarãpa parã nepirade baaipidamerã. Maa-e pirã piara bak'aji awaraarãpa parã k'uradamerã.

8 Mamïda mãga-e. ¿Parãpata nepira jiripata awaraarã ome mãik'aapa awaraarã k'urapata, parã ipemaarã mïda Cristo k'aurepa!

9 ¿Parãpa k'awada-e p'anik'ã k'achia oopataarã wãda-e pait'ee Ak'õre eujãdee ichideerã ome? K'ïrak'aupai ijãadak'aa beerãk'a p'anadai, nãgeerã wãdak'aa perã Tachi Ak'õre eujãdee: prostitutaarã; it'aa t'ipataarã awaraa ak'õre waibia apatamaa; miak'ãi p'anirã awaraarã ome k'ãipataarã; imik'ïraarã awaraa imik'ïraarã ome k'ãipataarã, imik'ïra wëra ome k'ãi bik'a;

¹⁰ nechiapataarã; p'arat'a waapiara iru p'ana k'inia p'anirã; it'ua toyaa beerã; ik'achia jarapataarã awaraarã ãpíte maa-e pirã k'ürayaa beerã awaraarã net'aa atadait'ee.

¹¹ Ijãadai naaweda, parã ùk'uru mãgá p'anapachida. Mamída Tachi Waibia Jesucristode ijãadak'ãri, iru piuda k'aurepa Tachi Ak'õrepa wëpapiji parãpa p'ek'au k'achia oopatap'edaa. Ichiaba parã awara biji ichi-it'ee, ichi Jaure pëik'ãri parã ome bapariimerã mãik'aapa oopimerã Cristopa oopi k'inia bik'a. Mãga ooji parã ichi k'irapite p'ek'au k'achia wëe p'anadamerã.

Tachi Ak'õrepa ijãapataarã k'ap'ia awara bida ichi-it'ee

¹² Eperãarãpa jarapata: “Ne-inaa jõma ooi michia oo k'inia bik'a.” Mamída ma ne-inaa k'achia bi pirã, maarepida mi k'aripa-e pait'ee. Ne-inaa jõma ooi. Mamída mãga oo k'inia bi k'aurepa mia oo-e pirã Cristopa oopi bik'a, ma ne-inaa jua ek'ari bapariit'ee, Cristo jua ek'ari bai k'ãyaara.

¹³ Ichiaba jarapata: “Chik'o iru p'ani k'odait'ee mãik'aapa bi iru p'ani ma chik'o aide banamerã.” Mamída na ewari Tachi Ak'õrepa ma omee weda jõpiit'ee. Wãara Tachi Ak'õrepa bi ooji chik'o aide banamerã. Mamída tachi k'ap'ia oo-e paji pariatua p'ek'au oodamerã. Jip'a ooji ichi Jaure ma k'ap'iade bapariimerã mãik'aapa tachia oodamerã Cristopa oopi bik'a.

¹⁴ Maperãpi Tachi Ak'õrepa tachi k'ap'ia jõpi-e pait'ee. Ma k'ãyaara ichi ewari waibia ewate tachi k'ap'ia chok'ai p'irabaipiit'ee Jesucristo

k'ap'ia p'irabaipidak'a. Māgá ooi jōmaarā k'āyaara waibiara bapari perā.

15 ¿Parāpa k'awada-e p'anik'ā tachi ijāapataarā araa p'aneepata Cristo ome irude ijāadak'āri? Tachi Ak'ōrepa tachi k'ap'ia ooji ichi Jaure aide bapariimerā. Mapa tachi k'ap'ia araa p'anapidaik'araa bi prostitutaarā ome.

16 ¿K'awada-e p'anik'ā eperā araa paru pirā prostituta ome, māgí wēra ome eperā apai pik'a paru? Māga k'awa p'ani Tachi Ak'ōre Ūraa p'ādade jara bairā:

'Māgá eperā omee weda eperā apai pik'a p'aneedait'ee.'

(Gn 2.24)

17 Jōdee eperā Cristode ijāak'āri, araa beepari iru ome māik'aapa ma eperā jaure apai pik'a beepari Tachi Ak'ōre Jaure ome. T'āri a-ba p'anapata.

18 Maperāpi p'ek'au oonáati awaraarā ome. Eperāpa awaraa p'ek'au k'achia ook'āri, ichi k'ap'ia araa bapik'aa awaraa eperā k'ap'ia ome. Mamīda awaraa ome p'ek'au ook'āri, ichi k'ap'ia k'achiade baaipipari, ichi k'ap'ia araa bi Cristo ome bipari perā awaraa eperā jua ek'ari, Cristo jua ek'ari bii k'āyaara.

19 ¿K'awada-e p'anik'ā Cristode ijāadak'āriipa Ak'ōre Jaure tachi k'ap'iade bapari, Tachi Ak'ōre ichi te waibiade baparik'a? Mapa Tachi Ak'ōreta tachi k'ap'ia chipari.

20 Iruata tachi neto pik'a ataji ichi Warra apai iru bada peik'āri piumerā tachi pari. Mapa parā ichideerā perā, k'achia oo amáati. Māgá ooruta pirā, ak'ipidai wāara oo k'inia p'ani irua oopi bik'a.

7

Ūraa miak'āidait'ee k'ĩsia p'anĩrã-it'ee

1 Īrá mia p'anaut'ee parãpa k'art'a p'ãdap'edaade iidi pëidap'edaa. Naapiara iidijida chisãgita pipiara bi ijãapari-it'ee, miak'āiit'ee maa-e pirã tuu bait'ee. Mi-it'ee piara bi tuu bait'ee.

2 Mamĩda imik'ĩra tuu bak'ãri, wëraarã ome pariatua p'ek'au oo nipai. Maperã imik'ĩrapa ichi wëra iru baipia bi; wërapa pida ichi imik'ĩra iru baipia bi.

3 Imik'ĩrapa ichi k'ap'ia wãak'aik'araa bi chi wëramaa; wërapa pida ichiaba ichi k'ap'ia wãak'aik'araa bi chi imik'ĩramaa.

4 Mãgá p'anapataadaipia bi wëra k'ap'ia chi imik'ĩra-it'ee perã mãik'aapa imik'ĩra k'ap'ia chi wëra-it'ee perã.

5 Jĩp'a Tachi Ak'õremaa it'aa t'ĩ k'iniapa pedee-teruta pirã, ma ewate araa k'ãida-e pait'ee. Mãga p'anadak'ãri, ãra k'ap'ia wãak'adai. Mamĩda ai t'ëepai waya k'ãidaipia bi, Satanapa k'achia oopia-maapa awaraa ome, p'oyaa chooda-e p'anadairã.

6 Mia mãga k'ĩsia bi. Pãchia jiridaipia bi Tachi Ak'õrepa oopi k'inia bi parãmaa.

7 Mi-it'ee pipiara bak'aji jõmaweda mik'a p'anadamerã. Mamĩda k'awa bi Tachi Ak'õrepa k'aripai ijãapari chaa k'awaamerã miak'ãipia bi wa mãga-e.

8 Mia ūraait'ee imik'ĩra tuu beerãmaa, wëra tuu beerãmaa mãik'aapa p'ëtrãa tuu beerãmaa mik'a p'anadamerã.

9 Mamĩda miak'ãi k'inia p'anĩ pirã, miak'ãiti, p'ek'au oo k'inia p'anadai k'ãyaara.

10-11 Ichiaba Tachi Waibiapa jarapi bik'a mia jara bi: wērapa ichi imik'īra amaaik'araa bi. Auk'a imik'īrapa ichi wēra amaaik'araa bi. Mamīda māga ooruta pirā, miak'āidaik'araa bi awaraarā ome. Ma k'āyaara waya araa padaipia bi āchi naaweda p'anadap'edaak'a.

12 Īrá mia ūraait'ee ijāapataarā miak'āi p'anadap'edaa ijāadak'aa beerā ome, Cristode ijāadai naaweda. Cristopa jaratee-e paji k'āata oodaipia bi. Mamīda mia nāga ūraait'ee. Eperā Cristode ijāaparipa wēra ijāak'aa bi iru bi pirā, amaaik'araa bi, chi wēra iru ome ba k'inia bi pirā.

13 Ichiaba wērapa imik'īra ijāak'aa bi iru bi pirā, amaaik'araa bi, chi imik'īrapa iru ome ba k'inia bi pirā.

14 Ijāapari araa bak'āri ijāak'aa bi ome, eperā apai pik'a p'ani. Māga bita, Tachi Ak'ōrepa chi ijāak'aa bi pia ak'ipari ma ijāapari k'aurepa. Māgá ichi-aba Ak'ōrepa āchi warrarā pia ak'ipari ma ijāapari k'aurepa.

15 Mamīda ma ijāak'aa bīpa chi Cristode ijāapari amaa k'inia bi pirā, māga oonaapáde adaik'araa bi, iru k'īra unuamaa iru bapiamapa. Tachi Ak'ōrepa k'inia bi ichideerā k'āiwee p'anapataadamerā.

16 Jōdee ma ijāaparipa chi ijāak'aa bi pēi k'inia-e bi pirā, chooipia bi. Māga ooru pirā, ai t'ēpai iru k'aurepa māgīpa Cristode ijāai. Parā ijāapataarāpa k'awada-e p'ani chisāgí ijāadak'aa beerāpa ijāadai parāpa k'aripapata perā. Tachi Ak'ōrepapai k'awa bi.

Sāga p'anapataadaipia bi ijāada t'ēpai

17 Irá mia nāga ũraait'ee. Parāpa jiridak'āri Cristopa oopi k'inia bi parāmaa, p'anadaipia bi parā p'anadap'edaak'a Tachi Ak'ōrepa ijāapik'āri. Mia māga jarateepari ijāapataarā jōmaarāmaa.

18 Tachi Ak'ōrepa Cristode ijāapiru pirā imik'īra tauchaa iru bi ichi k'ap'iade, ma eperāpa meraik'araa bi ma tauchaa iru bi. Jōdee ichi k'ap'iade tauchaa wēe bi pirā ijāak'āri, tauchaa bīpiik'araa bi.

19 Mia māga jara bi Tachi Ak'ōre-it'ee p'ua-e bairā eperāpa tauchaa iru bi wa wēe bi. Jīp'a Ak'ōrepa k'inia bi tachia oodamerā ichia jara bik'a.

20 Maperā awara baik'araa bi pichi naaweda bada k'āyaara, Tachi Ak'ōrepa ijāapik'āri.

21 Esclavo paji pirā ijāa beek'āri, k'īsianáaji pi eperā jua ek'ari bi perā. Jōdee chiparipa pi pēi k'inia bi pirā, k'āiwee uchíaji.

22 Esclavopa Cristode ijāak'āri, at'āri chipari iru bi mīda, esclavo-ee pik'a beepari, Cristopa iru uchia atada perā p'ek'au k'achia jua ek'ariipa. Jōdee esclavo-ee bipa Cristode ijāak'āri, Cristo esclavok'a beepari, irua oopi bik'a oopari perā.

23 Cristopa parā neto pik'a ataji ichi waa kurusode bat'ak'āri. Māgá ichi piuji parāpa p'ek'au k'achia oopata wēpapiit'ee māik'aapa parā o k'achiadeepa k'aripa atait'ee atuanaadamerā. Maperāpi parā ichideerā. Maperā óoti irua oopi bik'a, oodai k'āyaara eperāarāpa oopi k'inia p'anik'a.

24 Mapa ĩpemaarā, mia et'ewa jaradak'a p'anadaipia bi pāchi ijāadai naaweda p'anadap'edaak'a.

Tuu beerãpa iidi pëidap'edaa p'anauda

²⁵ Irá mia p'anaut'ee tuu beerãpa iidi pëidap'edaa. Mia p'oyaa jara-e Cristopa jarapida, irua nãgí jaratee-e pada perã. Mamïda Tachi Ak'õrepa mi chupiria k'awaap'eda, Cristode ijãapiji mãik'aapa iru ùraa mĩmaa jarateepiji. Maperã parãpa na ùraa ùridaipia bi.

²⁶ Irapema ijãapataarã miapi iru p'anadairã, mit'ee pipiara bi tuu bait'ee.

²⁷ Wëra iru bi pirã, yiaraa iru baik'araa bi. Jõdee wëe bi pirã, jiriik'araa bi.

²⁸ Mamïda miak'ãiru pirã, p'ek'au k'achia oo-e bi Tachi Ak'õre k'irapite. Ichiaba wëra tuu bipa imik'ira ataru pirã, p'ek'au k'achia oo-e bi. Mamïda chi miak'ãirutaarã audú miadait'ee na p'ek'au eujãde p'ani misa. Mapa mia jara bi pipiara bi tuu bait'ee.

²⁹ Irpemaarã, mia mãga jara bi k'ĩsia bairã taarã-e Cristo cheit'ee. Mãga ni p'anide miak'ãi p'anirã p'anadaipia bi tuu beerãk'a; chi Cristopa oopi bik'a oo p'anirãk'a.

³⁰ Ma awara t'ãri p'ua p'anirã maa-e pirã o-ia p'anirãpa k'ĩsiadaipia bi Cristopa ãchimaa oopi k'inia bi, ãchi k'ĩsiade iru p'ani k'ãyaara. Ichiaba ne-inaa neto atapataarãpa k'irãpadaipia bi ãchia net'aa atada ateeda-e pait'ee Tachi Ak'õre eujãdee.

³¹ Ma awara ne-inaa netopataarãpa k'irãpadaipia bi ãchia p'arat'a jitadap'edaa ne-inaa neto pëidap'edaa pari it'aa ateeda-e pait'ee. Ma p'arat'a mãik'aapa net'aa jiridai k'ãyaara, Cristopa oopi k'inia bi jiridaipia bi, na p'ek'au eujã mãik'aapa jõma aide nĩbi Tachi Ak'õrepa jõpiit'ee perã.

³² Mia nāga ũraait'ee k'ĩsia jōnanaadamerā. Imik'ĩra tuu bīpa jirīpari ooit'ee Cristopa oopi k'inia bīk'a.

³³ Mamīda miak'āi bī k'ĩsia nībapari na p'ek'au eujādepema net'aade māik'aapa chi wēra o-īa bapiit'ee.

³⁴ Māgí imik'ĩrapa auk'a oo k'inia bairā Cristopa oopi k'inia bī māik'aapa chi wērapa oopi k'inia bī, audú k'ĩsia nībī chi tuu bī k'āyaara. Ichiaba wēra imik'ĩra wēe bīpa k'awa k'inia bī Tachi Ak'ōrepa k'ĩsia iru bī ooit'ee ichi ome. Mamīda chi miak'āi bīpa k'awa k'inia bī chi imik'ĩrapa oopi k'inia bī, māga ooit'ee chi k'ima o-īa bamerā.

³⁵ Māga jaraji parā k'aripait'ee pia p'anapataadamerā māik'aapa pāchi t'āripa Cristopa oopi bīk'a oodamerā.

³⁶ Imik'ĩra tuu bīpa pedeeru pīrā miak'āiit'ee māik'aapa k'ap'īapa choo-e bī pīrā wēra wēe bait'ee maa-e pīrā ma wēra pedeeteeda t'āri p'uapi k'inia-e bī pīrā, miak'āipia bī. Māga ooru pīrā, p'ek'au k'achia oo-e bī.

³⁷ Mamīda ichi t'āride miak'āi k'inia-e bī pīrā māgí wēra ome māik'aapa k'ap'īapa choo bī pīrā, miak'āik'āraa bī.

³⁸ Māpai ma miak'āi k'inia bīpa pia k'ĩsia bī. Mamīda ma miak'āi k'inia-e bīpa pipiara k'ĩsia bī.

³⁹ Tachi Ak'ōre Ũraa p'ādade jara bī wēra miak'āi bīpa awaraa jirīk'āraa bī, ichi imik'ĩra chok'ai bī misa. Jōdee ichi k'ima piuk'āri, pia bī waya jirīmerā, mamīda Cristode ijāpari jirīpia bī.

⁴⁰ Mamīda mia k'ĩsia bī ma p'ētrāa t'āri o-īara bai miak'āi-ee beeru pīrā. Māga k'ĩsia bī mia. Mima Tachi Ak'ōre Jaurepa ichiaba k'ĩsiapipari.

8

Nechiara ata bidap'edaa ne-inaa juapa ooda k'irapite

¹ Irá mia p'anaut'ee parãpa iidi pëidap'edaa k'awaadait'ee k'odaipia bi wa k'odaik'araa bi nechiara ata bidap'edaa primisiak'a awaraa ak'õre waibia apata k'irapite. Mamïda mǎgí p'anau naaweda, k'inia bi parãpa k'irãpadamerã audua p'anadaik'araa bi k'awa p'anadairã ne-inaa ooda ai k'irapite it'aa t'ipata Tachi Ak'õre-e. Audua p'anadai k'ãyaara, tachia k'inia iru p'anadaipia bi mǎgee net'aade at'ãri ijãa p'anirã, Tachi Ak'õre pia k'awada-e p'anadairã. Mǎgá oo p'ani pirã, ãchi k'aripadai Tachi Ak'õre pipiara k'awaadamerã.

² Eperãpa k'isia bi pirã ichiata ne-inaa k'awa bi, wãara mak'iaara k'awa-e bi Tachi Ak'õrepa ichimaa k'awapi k'inia bi.

³ Mamïda eperãpa Tachi Ak'õre k'inia iru bi pirã, Tachi Ak'õrepa k'awa bi ma eperã wãara irude ijãapari.

⁴ Mǎgara ¿k'odaipia bik'ã wa k'odaik'araa bi nechiara ata bidap'edaa ne-inaa ak'õre waibia apata k'irapite? Tachi ijãapataarãpa pia k'awa p'ani mǎgee ne-inaa juapa ooda Tachi Ak'õre-e, ai k'irapite eperãarã it'aa t'í p'ani mïda, ãchi ak'õre waibia jïak'aapa. K'awa p'ani mǎgee ne-inaa Tachi Ak'õre-e, iru apai perã.

⁵ Ijãadak'aa beerãpa ijãapata atanede maa-e pirã ak'õrejirude maa-e pirã awaraa ne-inaade, na p'ek'au eujãdepema wa pajãdepema, ãchi ak'õre waibiarã jïak'aapa. (Mǎga pada paara, “ak'õre waibiarã” chok'ara paraak'aji.)

6 Mamĩda tachi ijãapataarã-it'ee Tachi Ak'õreta Ak'õre Waibia. Ijãapata irua ne-inaa jõmaweda ooji, eperãarã paara. Ma jõmaweda oopiji ichi Warra Jesucristomaa, tachia irude ijãadamerã mãik'aapa irua oopi bik'a oodamerã.

K'ĩrak'aupai ne-inaa k'achia oopidai ewaa ijãa p'anĩrãmaa

7 Tachia k'awa p'ani ne-inaa ai k'ĩrapite it'aa t'ĩpata Tachi Ak'õre-e. Mamĩda awaraarãpa waide pia k'awada-e p'ani. Ewaa ijãa p'anĩrãpa mãgee ne-inaa at'ãri iru p'ani ãchi naawedapema iru p'anapatap'edaa ak'õre waibiaak'a. Maperã ãchidepemapa k'oru pirã nechiarã awaraarãpa bidap'edaa mãgee ne-inaa k'ĩrapite, mãgĩ k'ĩsia p'uadarii, ma nechiarã k'orupa mãgĩ ak'õre waibia apata at'ãri waawee bai jĩak'aapa. Ma awara k'ĩsia p'ua bai waide k'awa-e bairã Cristode ijãa bide pia wa k'achia k'oit'ee mãgee nechiarã.

8 Parã, chi k'awa beerãpa mãgee ne-inaa Tachi Ak'õre-e, k'awa p'ani Tachi Ak'õrepa ma nechiarã k'o beerã pipiara beerãk'a ak'i-e pait'ee. Ichiaba ma nechiarã k'oamaa beerã ek'ariara beerãk'a ak'i-e pait'ee. Tachi Ak'õrepa tachi ijãapataarã jõmaweda auk'a ichideerãk'a ak'ipari.

9 Mamĩda, mãga k'awa p'anide, k'ĩrak'aupai k'ĩsia p'uapidai maa-e pirã ne-inaa k'achia oopidai chi mãga waide pia k'awada-e p'anĩrãmaa.

10 K'ĩsĩati nãgide. Chi mãga pia k'awa-e bipã parã unuru pirã mãgee ne-inaa bimãi nek'omaa p'ani, auk'a k'o k'iniadarii. Mãpai k'oru pirã, k'achiade baaii, k'ĩsia bairã ne-inaa k'achia oomaa bi.

11 Māgá parāpa ak'ipi k'inia p'anadairā k'awa p'ani māgee ne-inaa Tachi Ak'ōre-e, chi waide māga pia k'awa-e bi k'achiade baaipidai. K'īrak'aupai pāchi ĩpemamaa ne-inaa k'achia oopidai, Cristo ichiaba piuda perā iru k'aripait'ee.

12 Māgá pāchi ĩpemaarāmaa ne-inaa k'achia oopidak'āri, k'achia oomaa p'ani Cristo k'īrapite.

13 Maperā mi ĩpema k'achiade baairu pirā ne-inaa k'oparii k'aurepa, māgara mia waa nechiara k'o-e pait'ee. Ne-inaa k'achia oopi k'inia-e bi michi ĩpemaarāmaa mia nechiara k'o bi k'aurepa.

9

Pablo pedee ũripataarāpa iru k'aripadaipia bi

1 Ne-inaa jōmaweda ooi michia oo k'inia bik'a. Mamīda jīp'a oo k'inia bi Cristopa oopi bik'a, irua mi ichi ũraa jarateede pēida perā. Awaraa Cristopa jirit'eradaarāk'a, mia ichiaba Tachi Waibia Jesús unuji michi taupa. Parāpa pida Cristode ijāapata, mia parāmaa jarateenada perā irua ooda parā k'aripait'ee.

2 Ũk'uruurāpa ijāada-e p'ani mi Cristopa pēida. Māirāpa ak'i k'inia p'ani mia oopata māik'aapa jarateepata mi imiateedait'ee. Mamīda parā t'āidepema mia jarateeda ijāadap'edaarāpa k'awa p'ani Cristopa mi pēiji, mi k'aurepa Cristo ome araa p'anapata perā.

3 Chi ijāada-e p'anirāpa k'awa k'inia p'ani pirā Cristopa mi pēida wa māga-e, parā p'anapata ak'idaipia bi.

4 Cristopa mi wāara pēida perā, irude ijāapataarāpa chik'o māik'aapa pania mimaa teedaipia bi. ¿Wāara-ek'ā?

5 Awaraa Cristopa pēida eperāarā, Pedropa māik'aapa Cristo ipemaarāpa āchi wēraarā Cristode ijāa p'ani atEEPATA awara āyaa wādak'āri. Māga wādak'āri, ijāapataarāpa āra k'aripapata. ¿Parāpa auk'a mi ome māgá ook'ajida-ek'ā, wēra iru bada paara?

6 ¿Pia bik'ā mi Bernabé ome mimiadamerā chik'o iru p'anadait'ee? ¿Pia-e bak'ajik'ā taipa jara-teepata ūrirutaarāpa k'aripadamerā?

7 ¡K'ĩsĩati! Eperā soldao pak'āri, chik'o māik'aapa awaraa net'aa irumaa pari teepata. Ichiaba eperāpa ne-uuda chauk'āri, ichia madepema pari k'opari. Ichiaba ne-animalaarā wariparipa k'opari ichia wari bidepema. Māgapi p'ani tai jida ichiaba.

8 Michi k'ĩsiadoopa māga jara-e bi. Tachi Ak'ōre Ūraa Moisemaa p'āpidade ichiaba māga jara bi:

9 'P'ak'a it'ai jĩnāati trigo t'iamaa bak'āri. Ita-aria k'opiti.' (Dt 25.4)

Tachi Ak'ōrepa māga jarak'āri, p'ak'a aupai ichi k'ĩsiade iru ba-e paji.

10 Jĩp'a tai, ichi mimia oopataarāta, ichi k'ĩsiade iru baji, k'inia bairā awaraa ijāapataarāpa tai k'aripadamerā ne-inaa wēe p'anadak'āri. Ne-uupataarāpa ne-uu chauda p'epataarā ome auk'a jita k'inia p'ani āchi mimia pari.

11 Māga pik'a taipa jarateedak'āri Cristopa ooda parā k'aripait'ee, auk'a jita k'inia p'ani chik'o māik'aapa pania parā juadepema.

12 Awaraarãmaa tee p'ani pirã, ¿ichiaba taimaa teedaipia bi-ek'ã?

Mamĩda tachi juadoopa mimiapata, parãmaa ne-inaa iidida-e pait'ee. Mãga oopata parãpa k'ĩsianaadamerã taipa jarateepata ne-inaa falta p'ani atadait'ee.

13 Parãpa k'awa p'ani Tachi Ak'õre te waibiadepema altarmãi mimiapataarãpa mãik'aapa ne-animalaarã paapataarãpa k'opata eperãarãpa aneepatadepema paapidait'ee Tachi Ak'õre-it'ee.

14 Mãga pik'a Cristopa jaraji ichi ũraa jarateepataarãpa ne-inaa jitadaipia bi awaraa ijãpataarã juadeepa.

15 Mamĩda mia parãmaa maarepida iidi-e paji mãik'aapa at'ãri iidi-e bi. Ma k'ãyaara piu baibeei jarrapa parãmaa k'ĩsiapii k'ãyaara mia Cristo mimia oo bi ne-inaa atait'ee.

16 Mamĩda mi pipiara bi-e apemaarã pëida eperãarã k'ãyaara, ne-iidi-e bairã. Cristopata mi pëiji ichi ũraa jarateede. Maperãpi mia jarateepari. Waawee bak'aji, jaratee-e pada paara irua oopi bik'a, irua mi miapii jãak'aapa.

17 Ma awara michi k'inia jarateeda paara, ne-inaa ata k'inia bak'aji na mimia pari. Mamĩda mãga-e. Mia na mimia oopari Cristopa oopi bik'a. Mapa maarepida mimaa teeda-e p'ani mĩda, jĩp'a jarateeit'ee, ma-it'eeta Cristopa mi jirit'erada perã.

18 Mia maarepida parãmaa teepi-e pait'ee. Nãgapai mia k'inia bi. Michi t'ãripa na mimia oo k'inia bi Cristopa oopi bik'a.

19 Mia jõmaweda ooi Cristopa oopi bik'a, eperãarã esclavo-e perã. Mamĩda mi eperãarã esclavok'a

padaipari nāga perā. Ba k'inia bi mia jaratee bi ũri p'anirā p'anapatak'a, ma jaratee bi ũridak'āri, Cristode ijāadamerā.

²⁰ Judiorā t'āide jaratee nipak'āri, ārapa oopatak'a oopari. Ichiaba Moisepa p'ādade jara bik'a oopari. Cristode ijāadak'āriipa mi māgí ũraa p'āda jua ek'ari bi-e mīda, māga oopari ārapa irude ijāadamerā.

²¹ Jōdee judio-eerā t'āide jaratee nipak'āri, oopari ārapa oopatak'a. Mamīda Cristopa oopi k'inia bik'a oopari, ārapa ichiaba Cristode ijāadamerā.

²² Ma awara Cristode pia ijāada-e p'anirā jarateek'āri, jarateek'aa k'īsia k'awaa bīpa jarateeparik'a. Ārapa k'īsia p'anik'a mia k'īsiapari māik'aapa jīp'a jarateepari, ārapa Tachi Ak'ōre pipiara k'awaadamerā māik'aapa waapiara Cristode ijāadamerā. Michi wārumaa māga oo bi, k'inia bairā mia jaratee bi ũrirutaarāpa Cristode ijāadamerā.

²³ Ma k'aurepa ijāa p'ani pirā, mi ome auk'a k'awaadai jōmaweda Tachi Ak'ōrepa k'īsia iru bi ichideerā-it'ee.

²⁴ Parāpa k'awa p'ani p'irapataarā p'iradak'āri, jōmaweda isapai p'irapata, ata k'inia p'anadairā ne-inaa teepata chi naapiara panarumaa. Māga pik'a parā p'anadaipia bi, ne-inaa oomaa p'anide Cristopa oopi bik'a. Māgá atadai Tachi Ak'ōrepa k'īsia iru bi teeit'ee Cristode ijāapataarāmaa.

²⁵ Eperā p'irait'ee pak'āri, ichi k'ap'ia pia ak'ipari. Ewari chaa p'irapari iyapaa-e pait'ee apemaarā ome p'irak'āri. P'irapataarā jōmaarāpa māgá oopata, naapiara pana k'inia p'anadairā

atadait'ee poro jĩra k'irudee ooda; taarã chook'aa bita. Māga pik'a tachia oo k'inia p'ani oo amaapata māik'aapa Cristopa oopi bik'a oopata atadait'ee it'aripema poro jĩra; Tachi Ak'õrepa k'ĩsia iru bi teeit'ee ichideerāmaa; māgí ne-inaa jõk'aa bi.

²⁶ Mapa mia ook'aa p'irapari pariatua p'iraparik'a maa-e pirã boxeo chõoparik'a nāu aupai sĩk'āri. Jĩp'a t'āripa mia oopari Cristopa oopi bik'a.

²⁷ Michi p'ek'au k'achia ooyaa bi k'ap'ia ne-inaa oo k'inia bak'āri, māga oopik'aa nāga perã. Michi k'iniapai ooru pirã, k'ĩra nejasia bait'ee it'ari panak'āri Tachi Ak'õre k'ĩrapite. Ma awara māga ooru pirã, Cristopa ne-inaa k'ĩsia iru bi teeit'ee ichideerāmaa mĩmaa tee-e pait'ee, mia awaraarāmaa jaratee baji mĩda na p'ek'au eujãde bi misa.

10

Ūraa it'aa t'ĩnaadamerã awaraa ak'õre waibia apatamaa

¹ Irá ĩpemaarã, k'irãpapiit'ee sãga chonaarãweda Tachi Ak'õrepa tachi judiorã chonaarã ak'ipachi. Jĩraradeepa āra jõmaweda ak'i bapachi Egiptodeepa uchiadak'āri. Ma awara āra jõmaweda sĩapiji Mar Rojo esajĩak'a p'oodade.

² Ma jĩraradeepa Tachi Ak'õrepa o jara wãji āramaa Moisés k'ap'ia pari māik'aapa iru k'ap'ia pari āra k'aripaji Mar Rojo sĩadamerã. Māgá Tachi Ak'õrepa āra jõmaweda Moisés jua ek'ari biji, tachi ijãapataarã Cristo jua ek'ari bĩparik'a ijãadap'eda, poro choopidak'āri.

³ Ma awara Tachi Ak'õrepa *maná* pëida it'ariipa jõmaarãmaa k'opipachi

⁴ mãik'aapa topiji pania mãudeepa uchiapida. Cristo mǎgí mǎuk'ata baji, ichideepa uchiapachi perǎ Tachi Ak'õre Jaure k'aripade ãra wãrutamaa.

⁵ Tachi Ak'õrepa ma jõma oopachi mída ãra k'aripait'ee, ooda-e p'anapachida irua oopi k'inia badak'a. Mapa Tachi Ak'õrepa perǎ jõmaweda piupiji, eujã pania wëe bide wãyaarutade.

⁶ Tachia mǎgí chonaarãpa oodap'edaade k'ĩsiadak'ãri, k'awaadaipia bi ãrapa oodap'edaa k'achia baji Tachi Ak'õre k'ĩrapite. Mapa k'ĩrak'aupai mǎgá oodai ãrapa oodap'edaak'a. ;Oonaadáma tachia ne-inaa k'achia k'ĩra t'ãdoo oo k'inia p'anik'a!

⁷ It'aa t'ĩnáati ne-inaa juapa ooda k'ĩrapite, chonaarã ùk'uruurãpa oopatap'edaak'a. Tachi Ak'õre Ûraa p'ãdade jara bi:

'Eperãarãpa fiesta oojida ne-inaa juapa ooda k'ĩrapite, ai k'ĩrapite it'aa t'ĩpata. Ma-it'ee nek'ojida, ne-inaa tojida, maap'eda pëirajida.' *(Ex 32.6)*

⁸ Ichiaba pariatua p'ek'au oonáati, ma k'aurepa ewari abaade Tachi Ak'õrepa ãradepemaarã veintitrés mil k'iniipida perǎ.

⁹ Ichiaba Tachi Ak'õre k'ĩraupináati ãradepemaarãpa oodap'edaak'a, jaradak'ãri Tachi Ak'õrepa ãra p'oyaa pia ak'i-e paji. Maperã Tachi Ak'õrepa taamaarã pëiji k'aak'oodamerã. Mapa chok'ara piujida.

¹⁰ Ichiaba Tachi Ak'õre ãpите ik'achia pedeenáati ãradepemaarãpa oodap'edaak'a. Mǎga oodap'edaa

perã Tachi Ak'õrepa it'ariipa ichi ángel pëiji; mǎgipa chok'ara peemerã.

11 Tachi chonaarã mǎgá p'anadap'edaa perã, pia ak'idaipia bi árapa oodap'edaa, Tachi Ak'õrepa mǎgí oodap'edaa p'ãpida perã ichi ũraa p'ãdade, tachia k'awaadamerã mǎik'aapa auk'a oonaadamerã, ni p'ani misa na p'ek'au eujã jõru.

12 Mǎpai parã t'ãidepemapã k'ĩsia bi pirã ichi-ata oopari Cristopa oopi bik'a, k'ĩrak'aupai ne-inaa k'achia ooi.

13 Edaare tachi t'ãridepai k'ĩsia p'aneepata ne-inaa k'achia oodait'ee. Ma awara netuarapa k'ĩsiapipari ne-inaa k'achia oodamerã. Mǎga p'asapari jõmaarã ome. Mamĩda mǎga p'asak'ãri parã ome, ijãadaipia bi Tachi Ak'õrepa k'aripait'ee choodamerã, k'achia ooda-ee.

14 Maperã, ipemaarã k'iniarã, parãpa k'ĩsiaruta pirã wãdait'ee awaraa ak'õre waibia apata k'ĩrapite it'aa t'ĩde, jmǎgá oonáati!

15 Parã k'ĩsia k'awaa p'ani. Mapa k'ĩsiadaipia bi mia jara bide k'awaadait'ee seewa maa-e pirã wãara.

16 jK'ĩsíati! ¿K'ãata jara k'inia bima tachia oopata, vino todak'ãri mǎik'aapa pan k'odak'ãri k'irãpadait'ee Jesucristo piuda tachi pari? Todai naaweda mǎik'aapa k'odai naaweda, it'aa t'ĩpata Tachi Ak'õremaa jaradait'ee iru t'ãri pia bi Cristo tachi pari piupida perã. Ma vino todak'ãri, k'irãpa p'ani Cristo waa bat'ada k'aurepa, tachi araa p'anapata iru ome. Ichiaba ma pan k'odak'ãri, k'irãpa p'ani Cristo k'ap'ia piuda k'aurepa tachi araa p'anapata apemaarã Cristode ijãapataarã ome.

17 Tachi chok'ara p'ani mīda, māgí pan k'odak'āri, eperā apai pik'a p'anapata Cristo piuda k'aurepa, iru ome tachi chaachaa araa p'anapata perā.

18 ¡K'ĩsĩati! Israel pidaarāpa ne-animalaarā ateedak'āri paapidait'ee Tachi Ak'ōre altarmāi, ak'ipipata irude ijāa p'ani. Ma awara māgí ne-animalaarādepema k'odak'āri, ak'ipipata āchi Tachi Ak'ōredeerā.

19 Ma jaradapa mia jara k'inia-e bi ne-inaa ai k'ĩrapite it'aa t'ĩpata Tachi Ak'ōrek'a bi. Ichiaba jara k'inia-e bi nechiara ata bidap'edaa ma k'ĩrapite pipiara bi awaraa nechiara k'āyaara.

20 Ma k'āyaara jara k'inia bi Tachi Ak'ōrede ijāadak'aa beerāpa nechiara k'odai naaweda, biruta pirā ne-inaa juapa ooda k'ĩrapite, ak'ipipata māgide ijāa p'ani, tachia Cristode ijāapatak'a. Mamīda māga oodak'āri, wāara ooda-e āchi ak'ōre waibia apata-it'ee. Jĩp'a oopata netuaraarā-it'ee, māgee ne-inaa juapa ooda k'ĩrapite it'aa t'ĩpata netuarade perā. Maperā parā wānāati māgí ne-inaa ai k'ĩrapite it'aa t'ĩpatamaa k'odait'ee nechiara ata bidap'edaa ma ne-inaa k'ĩrapite. Māga ooruta pirā, ak'ipi p'ani araa p'ana k'inia p'ani netuaraarā ome. ¡Mia māga k'inia-e bi!

21 ¿Parā araa p'anadaipia bik'ā netuara ome? ¡Māgá oodaik'araa bi, Cristo waa bat'ada k'aurepa iru ome araa p'anapata perā! ¿Netuara eere p'anirā ome k'odaipia bik'ā nechiara netuaramaa teeda? Māga oodaik'araa bi, Cristode ijāapataarā ome araa p'anapata perā iru piuda k'aurepa.

22 ¡Tachi Ak'ōre k'ĩraupināati omee weda oo k'inia p'anipa! ¿K'ĩsia p'anik'ā Tachi Ak'ōre p'oyaadai,

irua parã miapinaamerã?

Apemaarã ijãapataarã ijãa amaapidaik'araa bi

²³ “Michia oo k'iniata ooit'eeda” apata. Mamïda ma ne-inaa k'achia bi pirã, tachia apida k'aripada-e pait'ee. Tachia ne-inaa oodaipia bi jõmaarãpa Tachi Ak'õre Ûraa pipiara k'awaadamerã mãik'aapa oodamerã Cristopa oopi bik'a.

²⁴ Apidaapa ne-inaa oodaik'araa bi ichi-it'ee aupai. Ichiaba oopia bi awaraarã k'aripait'ee.

²⁵ Nechiara netodak'ãri chi netopatamã, iidináati mǎgí nechiara ata bijida ne-inaa k'ĩrapite wa mǎga-e. K'awaa ataruta pirã ma nechiara ata bidap'edaa ne-inaa k'ĩrapite, k'ĩsia p'uadariit'ee.

²⁶ Mǎga iididaik'araa bi Tachi Ak'õre Ûraa p'ãdade jara bairã:

‘Na p'ek'au eujã mãik'aapa jõmaweda aide nĩbi Tachi Ak'õre-it'ee, ichiata ooda perã.’ (Sal 24.1)

²⁷ Tachi Ak'õre Ûraade mǎga jara bairã, Cristode ijãak'aa bipa parãdepema aba atee k'inia bi pirã ichi temaa nek'ode, mãik'aapa pi wã k'inia bi pirã, wãji mãik'aapa k'óji ãrapa teeruta. K'ĩsianáaji mãik'aapa iidináaji ma nechiara ata bijida ne-inaa k'ĩrapite wa mǎga-e.

²⁸ Mamïda mama bide awaraapa pĩmaa jarai: “Nǎgí nechiara ata bijida ne-inaa juapa ooda k'ĩrapite, ai k'ĩrapite it'aa t'ĩpata”. Mǎga jararu pirã, pia ma nechiara k'oik'araa bi, mǎgí eperã k'ĩsia p'uapiamaapa.

²⁹ Mia mǎga jara-e bi pi k'ĩsia p'ua bai jĩak'aapa; jĩp'a chi apemamaa k'ĩsiapiamaapa parãpa k'achia oodai mǎgí nechiara k'oruta pirã.

Mamĩda pia iidii: “¿K'ãare-it'ee mia oopia bima awaraarãpa oopi k'inia p'anik'a, ãchi k'ĩsia p'ua p'anadairã?

³⁰ ¿Pia-e bik'ã, Tachi Ak'õremaa gracias jarap'eda k'oit'ee ne-inaa k'ĩra t'ãdoo? Pia bi pirã, ¿mia, sãap'eda ooima awaraapa oopi k'inia bik'a?” Mia jarait'ee sãap'eda mãga oodaipia bi.

³¹ Tachia ne-inaa k'odak'ãri maa-e pirã todak'ãri maa-e pirã ne-inaa awaraa oodak'ãri, jõmaweda oodaipia bi Tachi Ak'õre-it'ee, jõmaarãpa iru waaweederã.

³² Mapa parãpa piata oodaipia bi judiorã k'ĩrapite mãik'aapa judio-eerã k'ĩrapite mãik'aapa awaraa ijãapataarã k'ĩrapite, ne-inaa k'achia oo k'inia p'ananaadamerã parã k'aurepa.

³³ Mia jiripari mãga ooit'ee. Ne-inaa oo-e michi-it'ee aupai. Jõma oopari awaraarã k'aripait'ee, ãrapa Cristode ijãadamerã. Mãgã irua ãra o k'achiadeepa k'aripa atai.

11

¹ Óoti mia ooparik'a, mia oopari perã Cristopa jarateedak'a na p'ek'au eujãde nipak'ãri.

Sãga oodaipia bi ijãapataarã it'aa t'ĩdait'ee pak'ãri

² Írã mia jara k'inia bi parãpa pia oo p'ani, k'irãpa p'anadairã mi sãga bapari parã ome bak'ãri. Mi o-ĩã bi parã ome, at'ãri oopata perã mia jarateedak'a.

³ Mamĩda k'inia bi parãpa pipiara k'awaadamerã Tachi Ak'õre jõmaarã k'ãyaara waibiara bi. Cristo iru jua ek'ari bi mãik'aapa imik'ĩraarã Cristo jua ek'ari p'ani mãik'aapa wẽraarã ãchi imik'ĩraarã jua ek'ari p'ani.

4 Maperã parã ijãapataarã chip'edaidak'ãri, imik'ĩrapa ichi poro wãk'aik'araa bi it'aa t'ĩmaa bak'ãri maa-e pirã Tachi Ak'õrepa jarapiru jaramaa bak'ãri. Ichi poro wãk'aru pirã, ak'ipit'ee ichia waawee-e ichi poro waibia Cristo.

5 Jõdee wẽrapa ne-inaa ichi porode jĩpia bi, it'aa t'ĩk'ãri maa-e pirã Tachi Ak'õrepa jarapiru jarak'ãri. Ichia wãk'apari jĩ-e bi pirã, ak'ipii ichi imik'ĩra waawee-e bi. Ma awara awaraarãpa mãgí wẽra ak'idak'aa pait'ee wẽra piak'a, wẽra poro wẽpida pia ak'idak'aa perã.

6 Mãgí ijãapari wẽrapa ichi porode ne-inaa wãk'apari jĩk'inia-e bi pirã, ¿pipiara bak'aji-ek'ã ichi puda jida t'ĩpit'aamerã maa-e pirã wẽpit'aamerã, wẽra k'achia beerã ome oopatak'a? Mamĩda k'ĩra nejasia bi pirã mãgá bait'ee jõmaarã k'ĩrapite, mãgara puda t'ĩpiik'araa bi. Ma k'ãyaara ne-inaa wãk'apari ichi porode jĩpia bi.

7 Pia jarait'eera, imik'ĩrapa ichi poro wãk'aik'araa bi ichi Tachi Ak'õre k'ĩrak'a bairã mãik'aapa ichi Tachi Ak'õrepa bida perã na p'ek'au eujãde nĩbi poro waibia bamerã. Jõdee wẽrapa ichi poro wãk'aipia bi ak'ipit'ee imik'ĩra ichi poro waibia.

8 Mĩa mãga jara bi Tachi Ak'õrepa eperã ook'ãri, imik'ĩra naapiara ooda perã, maap'eda wẽra ooji mãgí imik'ĩra orrodeepa.

9 Tachi Ak'õrepa mãgí imik'ĩra oo-e paji wẽra k'aripamerã; jĩp'a wẽrata ooji imik'ĩra k'aripamerã.

10 Maperã wẽra Cristode ijãapari pirã, ichi poro wãk'aipia bi. Mãga ook'ãri, ak'ipipari Tachi Ak'õre k'ĩrapite mãik'aapa iru angeleerã k'ĩrapite, ichi ba-

pari imik'ĩra jua ek'ari m̄aik'aapa Cristo jua ek'ari.

11 Mamĩda Cristode ij̄aadak'āri, w̄era imik'ĩra ome auk'a p'ani Tachi Ak'ōre k'ĩrapite. Mapa chik'aripa p'anapataadaipia bi.

12 Tachia k'awa p'ani m̄agá auk'a p'ani omee weda uchiadap'edaa per̄ã Tachi Ak'ōre juadeepa. Chi naapema w̄era uchiaji chi naapema imik'ĩradeepa. Mam̄aik'aapata imik'ĩraar̄ã uchiapata w̄eraar̄ãdeepa t'odak'āri.

13 M̄apai, par̄ãpata ak'idaipia bi k'awaadait'ee pia bi wa pia-e bi ij̄apari w̄era ne-inaa w̄ak'apari w̄ee porode it'aa t'imer̄ã Tachi Ak'ōremaa.

14 Ma awara p̄achia oopatade k'ĩsiadak'āri, k'awa p'ani pia-e bi imik'ĩra puda waree bamer̄ã.

15 J̄odee w̄era puda waree bak'āri, k'ĩra w̄aree unupata. Mamĩda Tachi Ak'ōrepa m̄agá waripi-e paji k'ĩra w̄aree aupai ak'idamer̄ã; j̄ip'a ak'ipiit'ee w̄era ichi imik'ĩra jua ek'ari bi.

16 Apidaapa mia jara aupada ij̄aa k'iniada-e p'ani pir̄ã, ij̄aanáati. Mamĩda k'awaadaipia bi taipa j̄oमार̄ãmaa m̄aga jarateepata. Ma awara ij̄apataar̄ã apemaar̄ãpa oopata ma jarateepatak'a.

S̄aga oodaipia bi Jesucristo piuda k'ir̄ãpadait'ee

17 Ir̄ã ūraait'ee s̄aga oodaipia bi par̄ã ij̄apataar̄ã cheepurudak'āri Cristo piuda k'ir̄ãpadait'ee. Ai naawedapemak'a p'oyaa jara-e p̄achia pia oomaa p'ani, m̄agá ooda-e p'anadair̄ã. Cristopa oopi k'inia bik'a oodai k'āyaara, ne-inaa k'achia oomaa p'ani.

18 M̄aga jara bi mimaa nepir̄idap'edaa per̄ã par̄ãdepema ũk'uru cheepurudak'āri, ne-inaa jedek'odak'aa auk'a k'ĩsiada-e p'anadair̄ã. Mapa

awara-awaraa nek'opata. K'ĩsia bi wãara ũk'uru mĩmaa nepiridap'edaa.

¹⁹ Mamĩda mǎgá parǎdepema ũk'uruurãpa pǎchia oo k'iniata ooda-e pada paara, k'awa-e pak'aji chisǎgĩrãpa wãara oopata Cristopa oopi bik'a, iru k'inia iru p'anapata perǎ.

²⁰ Mǎgá pariatua k'o p'anik'a k'odaik'araa bi. ¡Mǎgá Cristo piuda k'irãpadak'aa!

²¹ Mĩmaa nepirijida parǎdepemaarǎ ũk'uru cheepurudak'ǎri ne-inaa jedek'odait'ee, apemaarǎ ijǎapataarǎ nĩda-ee. Maperǎpi ijǎapataarǎ ũk'uru jarra oopata. Jǎdee awaraarãpa k'opata bi jǎwaadarutamaa mǎik'aapa vino topata piu p'aneerutamaa.

²² Chi mǎga oopataarãmaa iidi k'inia bi: ¿Pǎchi te wēe p'anik'ǎ nek'odait'ee mǎik'aapa todait'ee? ¿Waaweeda-e p'anik'ǎ pǎchi ĩgrete, chi araa che p'anĩrǎ jida ichiaba? ¿Chupiria chedeerǎ k'ĩra ne-jasiapi k'inia p'anik'ǎ? ¿K'ǎata parãmaa jaraima? ¿Pia oo p'anik'ǎ? ¡Mǎga-epi!

*Jesupa ooda k'irãpapiit'ee ichide ijǎapataarãmaa
(Mt 26.26-29; Mr 14.22-25; Lc 22.14-20)*

²³ Jesucristopa mĩmaa jarateeda, mĩa jǎdee parãmaa jarateaji. Ai ewate p'ǎrik'ua Jesús traicionaada naaweda, nek'omaa p'anide ichia pan ataji

²⁴ mǎik'aapa it'aa t'ĩji gracias jarait'ee Tachi Ak'õremaa. Ma pan k'õrat'aaji jedeit'ee mǎik'aapa mǎgaji:

—Nǎgĩ pan mi k'ap'ia, mi peepiit'ee perǎ parǎ k'aripait'ee. Nǎgá pan k'odak'ǎri, k'opataati k'irãpadait'ee mi piuda parǎ pari.

²⁵ Māgá ichiaba, nek'o aupadap'eda, Jesupa vino copa jitaji māik'aapa māgaji:

—Nāgí vino mi waa, michi waa bat'ait'ee perā mi piuk'āri eperāarā pari. Tachi Ak'ōrepa nāgí ūraa chiwidi jara bi. Michi waa bat'ada k'aurepa irua wēpapiit'ee parāpa p'ek'au k'achia oopata māik'aapa michideerā papiit'ee. Nāgá vino todak'āri, topatāati k'irāpadait'ee mia ooit'ee bi eperāarā pari.

²⁶ Māga jarada perā Jesucristopa, tachia ma pan k'odak'āri māik'aapa ma vino todak'āri, k'irāpapata Cristo piuda tachi pari. Māgá oo p'anadait'ee, iru waya cheru misa.

K'īrak'aupai pan vino ome pariatua k'odai

²⁷ Māga jōmaarāmaa ak'ipipata perā, eperāpa ma pan pariatua k'oru pirā maa-e pirā ma vino pariatua toru pirā, k'achia oomaa bi, ichi-it'ee p'ua-e bairā Cristo piuda jōmaarā pari.

²⁸ Maperāpi Cristode ijāapari chaa ma pan k'oi naaweda māik'aapa ma vino toi naaweda, ichi t'āridepai k'īsiaipia bi k'awaaait'ee wāara k'oru māik'aapa toru k'irāpait'ee Cristo piuda ichi pari wa māga-e.

²⁹ Māgá oopia bi Tachi Ak'ōrepa miapiit'ee perā ma pan pariatua k'opataarā māik'aapa ma vino pariatua topataarā, chik'o jīp'aa k'opatak'a.

³⁰ Parādepema chok'ara māgá pariatua k'opata perā, k'ayaa p'ani māik'aapa ūk'uru jai-idaa p'ani.

³¹ Mamīda māgí k'odai naaweda māik'aapa to-dai naaweda, k'īsiaruta pirā oo amaadait'ee tachia p'ek'au k'achia oopata, Tachi Ak'ōrepa tachi miapi-e pait'ee.

32 Māga oodak'āri, pariatua k'oda-e pait'ee. Tachi Ak'ōrepa miapipari ma pan pariatua k'opataarā māik'aapa ma vino pariatua topataarā, āchia k'awaadamerā irua oopi k'inia bi. Māga k'awaadak'āri māik'aapa oodak'āri, irua āchi k'aripait'ee atuanaadamerā ijāadak'aa beerāk'a, eperāarā jōmaweda panadak'āri iru k'īrapite.

33 Mapa ĩpemaarā, cheepurudak'āri pan k'odait'ee māik'aapa vino todait'ee Cristo piuda k'irāpadait'ee, nīpatáati jōmaweda cherutamaa, chik'inia ne-inaa jedek'odait'ee.

34 Apida jarrapisia bi pīrā, chei naaweda, ichi temāi nek'oipia bi. Parāpa māga ooruta pīrā, Tachi Ak'ōrepa miapi-e pait'ee pariatua k'o p'ani k'aurepa.

Mi parāmaa wāk'āri, waapiara jarateeit'ee.

12

Tachi Ak'ōre Jaurepa ne-inaa oopipari Cristode ijāapataarāmaa

1 ĩrá ĩpemaarā, p'anaut'ee parāpa iidi pēidap'edaa. Iidijida k'āata oopipari Tachi Ak'ōre Jaurepa Cristode ijāapataarāmaa. Nāgí jarateeit'ee pia k'awaadamerā.

2 K'irāpa p'ani parā p'anapatap'edaa Cristode ijāadai naaweda. Tachi Ak'ōre k'īrapite k'achia oopachida it'aa t'īpatap'edaa perā ne-inaamaa, Tachi Ak'ōre awara. Māga oopachida māgee ne-inaa pedeedak'aa beemaa, chok'ai-e p'ani mīda.

3 Māga oopachida pia k'awadak'aa pada perā sāga Cristode ijāadait'ee māik'aapa sāga oodait'ee irua parāmaa oopi k'inia bik'a. K'awapatáati

Tachi Ak'õre Jaurepa eperãarãmaa nãga jarapik'aa: "Jesús Tachi Ak'õre Warra-e". Jĩp'a jarapipari: "Jesús Tachi Poro Waibia."

⁴ Parãpa k'awaadaipia bi Tachi Ak'õre Jaurepa Cristode ijãapataarãmaa ne-inaa k'ĩra t'ãdoo oopipari chik'aripa p'anapataadamerã. Mãga oopari ne-inaa pia oo k'inia bairã ijãapataarã-it'ee.

⁵ Ichia ma ne-inaa jõma oopipari Cristo, Tachi Poro Waibia oopi k'inia bik'a.

⁶ Ijãapari chaa ma ne-inaa awara ooi ichi k'õp'ãyo k'ãyaara. Mamĩda Tachi Ak'õrepata ma ne-inaa ichita ãramaa oopipari.

⁷ Mãgã Tachi Ak'õre Jaurepa ma ne-inaa awara-awaraa oopipari Cristode ijãapataarãmaa, ãchi chik'aripa p'anapataadamerã.

⁸ Abaamaa k'ĩsia k'awaapipari jarateemerã ne-inaa Tachi Ak'õrepa k'awapi k'inia bi. Awaraarãmaa pipiara k'awapipari Tachi Ak'õrepa wãarata jara pẽida, mãga jarateemerã.

⁹ Ichiaba Tachi Ak'õre Jaurepa waapiara ijãapipari Cristode ijãa bĩmaa, k'awaamerã wãara uchiat'ee Tachi Ak'õrepa jara bik'a, waide unu-e bi mĩda. Ichiaba awaraarãmaa k'ayaa beerã jipapipari.

¹⁰ Ma awara awaraarãmaa ne-inaa oopipari eperãarãpa p'oyaa oodak'aa ãchi juadoopa. Awaraarãmaa jarapipari Tachi Ak'õrepa jarapi bik'a. Awaraarãmaa k'awapipari eperãpa wãara jaratee bi Cristopa oopi bik'a wa netuarapa oopi bik'a. Awaraarãmaa pedeepipari irua k'awa-e bi pedeede, jarateemerã Tachi Ak'õre Ũraa mãgã pedee bĩpa. Awaraarãmaa k'awapipari k'ãata jara

bi ma eperãpa, pedee irua k'awa-e bita pedeek'ãri, jõmaarãpa k'awaadamerã irua jara k'inia bi.

11 Mãgá oopari Tachi Ak'õre Jaurepa. Irua aupaita k'awapipari Cristopa oopi k'inia bi ichide ijãapataarãmaa.

Cristode ijãadak'ãri, tachi k'ap'ia apai pik'a p'ani

12 Írá jarait'ee sãap'eda Tachi Ak'õre Jaurepa mãgá ne-inaa awara-awaraa oopipari Cristode ijãapataarãmaa. Tachi k'ap'ia apai bi mĩda, aide nãgee paraa: bĩiri, poro, jua, t'ãri; jãga bee chok'ara. Mãga pik'a Cristo apai bi mĩda, irude ijãapataarã araa p'anapata iru ome. K'ap'ia apai pik'a p'ani, chok'ara p'ani mĩda.

13 Tachi ijãapataarã mãga p'ani ijãapari chaa Cristode ijãa beek'ãri, Tachi Ak'õre Jaurepa iru araa bapipari perã apemaarã ijãapataarã ome. Auk'a oopari judiorã ome, judio-eerã ome, esclavoorã ome, esclavo-eerã ome. Mãga oopari, chok'ara p'ani mĩda, apai pik'a p'anadamerã Cristo ome. Mapa tachia poro choopipata ak'ipidait'ee araa p'ani Cristo ome Tachi Ak'õre Jaure k'aurepa.

14 Tachi eperã k'ap'iade bi poro, jua, bĩiri mãik'aapa t'ãri. Jãgee jõmaarãpa k'aripapata tachia ne-inaa oodamerã. Mãga pik'a tachi ijãapataarã chok'ara p'ani mĩda, chik'aripa p'anapata Cristo-it'ee ne-inaa oodait'ee.

15 K'ĩsiadáma nãgĩde. Tachi bĩiri pedeeda paara, jarak'aji: “Juapa mi k'ãyaara ne-inaa chok'araara oopari perã, mi mak'iaara servi-e bi na k'ap'iade.” Mãga jarak'aji mĩda, at'ãri tachi k'ap'iade bi.

16 Maa-e pirã tachi k'ĩiri pedeeda paara, jarak'aji: “Tau mi k'ãyaara pipiara bairã, mi

mak'iaara servi-e bi na k'ap'iaade.” Māga jarak'aji mīda, at'āri tachi k'ap'iaade bi.

17 Tachi k'ap'ia jōma tau pada paara, k'iri wē-e pak'aji ūridait'ee māik'aapa jōma k'iri pada paara, k'ī wē-e pak'aji idait'ee.

18 Mamīda māga-e. Tachi Ak'ōrepa tachi k'ap'iaade nībi jōmaweda biji māgī bimāi, ichia k'isia iru badak'a.

19 Tachi k'ap'ia jōmaweda biiri maa-e pirā jua maa-e pirā tau pada paara, k'ap'ia wēe p'anak'ajida.

20 Mamīda māga-e. Ne-inaa k'ira t'ādoō paraa mīda, ichita k'ap'ia apai bi.

21 Tachi k'ap'ia māga bi perā, tachi tau pedee k'awaa bada paara, p'oyaa jara-e pak'aji juamaa: “Mia pi k'inia-e”. Poropa pida p'oyaa jara-e pak'aji biirima: “Mia pi k'inia-e.”

22 Ma k'āyaara ne-inaa jōma tachi k'ap'iaade, mak'iaara p'oyaa ooda-e pik'a k'edee paara, auk'a k'aripapata tachi k'ap'ia chok'ai bamerā māik'aapa k'ap'ia pia bamerā.

23 Ma awara tachi k'ap'iaade nībi ūk'uru pia chi-oopata tachi piara unudamerā. Mamīda ūk'uru awaraarāmaa unupi k'iniadak'aa. Mapa wāk'apata p'arupa.

24 Jōdee chi unupi k'inia bita taawa iru p'anapata. Māga oopata Tachi Ak'ōrépata tachi k'ap'ia māga ooda perā, pipiara iadamerā aide nībi mak'iaara p'oyaa oo-e pik'a k'edee māik'aapa pia-e pik'a k'edee.

25 Māga ooji tachi k'ap'iaade nībi jōma chik'aripa p'anadamerā.

26 Tachi k'ap'iaide bi apida p'ua nĩbeeru pĩrã, k'ap'ia jõmaweda miapari ma k'aurepa. Jõdee tachi k'ap'iaide nĩbi apida pi-ia unuruta pĩrã, k'ap'ia jõmaweda o-ĩadaipari.

27 Ma jõma jara aupadade k'ĩsiadak'ãri, k'awa p'ani tachi ijãapataarã Cristo k'ap'iak'a p'ani, iru ome araa p'anapata perã.

28 Tachi Ak'õrepa tachi k'ap'iaide nĩbi chaa mimia awara-awaraa biji tachi k'aripamerã mãik'aapa k'ap'ia pia p'anadamerã. Mãga pik'a ichi Jaurepa Cristode ijãapataarãmaa mimia awara-awaraa bipari, ma mimia oo p'anide chik'aripa p'anapataadamerã. Naapiara bipari Jesucristopa jirit'eradaarã pëiit'ee ichi ũraa jarateede; ai eere bipari Tachi Ak'õrepa jarapi bik'a jarapataarã; mǎgí t'ëe bipari Tachi Ak'õre Ũraa jarateepataarã; maap'eda ne-inaa oopataarã eperãarãpa p'oyaa oodak'aa ãchi juadoopa; k'ayaa beerã jipapataarã; ijãapataarã k'aripapataarã; ijãapataarã ak'ipataarã; pedeepataarã ãchia k'awada-e p'ani pedeede.

29 Tachi Ak'õrepa ijãapataarã jõmaweda jirit'era-e Cristopa pëimerã ichi ũraa jarateede. Ichiaba jõmaarãmaa ichia jarapi bik'a jarapi-e; jõmaarãpa iru ũraa jarateeda-e; jõmaarãpa ne-inaa ooda-e eperãarãpa p'oyaa oodak'aa ãchi juadoopa;

30 jõmaarãpa k'ayaa beerã jipada-e; jõmaarãpa pedeeda-e ãchia k'awada-e p'ani pedeede; jõmaarãpa k'awada-e chi pedeerupa jara k'inia bi ma k'awada-e p'ani pedeede.

31 Maperã parãpa iididaipia bi Tachi Ak'õre Jau-repa parãmaa madepema pipiara bita bimerã. Mǎgá pipiara p'anapataadait'ee.

Māgá oo p'ani mīda, mia ak'ipii't'ee sāga wāara pipiara p'anapataadai.

13

Chik'inia p'anapataadaipia bi

¹ Pipiara p'ana k'inia p'ani pirā, chik'inia p'anapataadaipia bi. Tachia eperāarā pedee k'īra t'ādoō pedee p'ani mīda māik'aapa angeleerā pedee paara pedeeruta pijida, pari māga oopata t'āripa awaraarā k'inia iru p'anada-e p'ani pirā. Māga p'anaruta pirā, tachi ma pedeede pedeedak'āri, awaraarāpa ūridai campana pariatua chaaparik'a.

² Ichiaba Tachi Ak'ōrepa jarapi bik'a jara p'ani mīda māik'aapa k'awa p'ani mīda ne-inaa k'īra t'ādoō, Tachi Ak'ōrepa waide jara-e bi paara eperāarāmaa, páripī p'anapata awaraarā k'inia iru p'anada-e p'ani pirā. Ma awara audú ijāaruta pijida ee āyaa birutamaa tachia jararutapa; awaraarā t'āripa k'inia iru p'anada-e p'ani pirā, ichi k'inia māga oo p'ani.

³ Ma awara tachia net'aa iru p'ani jōmaweda tee p'ani mīda chupiria chedeerāmaa māik'aapa tachi k'ap'ia paara paapeepiruta pijida Cristode ijāa p'ani k'aurepa, t'āripa awaraarā k'inia iru p'anada-e p'ani pirā, tachi-it'ee wē-e pait'ee Tachi Ak'ōrepa k'īsia iru bidepema, it'ari panadak'āri.

⁴ Tachia wāara awaraarā k'inia iru p'anadak'āri, nāga p'anapata. T'āridepai choopata. Awaraarāmaa ne-inaa pia oopata. Awaraarā unuamaa iru p'anadak'aa, ārapa ne-inaa iru p'ani k'aurepa. Ichiaba tachia ooda jōmaarāmaa jaradak'aa, ārapa k'īsiadamerā tachia ne-inaa oo k'awaa p'anapata. Audua p'anadak'aa.

5 Chĩara k'ĩraupidak'aa mĩik'aapa k'ĩra nejasiapidak'aa. Tachi-it'ee ne-inaa pipiara jiridak'aa. Isapai k'ĩraudak'aa. K'ĩra p'u-ua p'anadak'aa tachi-maa chĩarapa ne-inaa k'achia ook'ãri.

6 O-ĩa p'anadak'aa unudak'ãri awaraapa ne-inaa k'achia oomaa bi. Jĩp'a o-ĩadaipata irua ook'ãri Tachi Ak'õrepa wãarata jara pëidak'a.

7 Ma awara chĩarapa tachi miapidak'ãri, choopata ijãapata perã Ak'õrepa tachi k'aripait'ee. Ijãapata k'achia p'oyaadai. T'ãride ichita choopata awaraarã k'inia iru p'anadairã.

8 Mãgá awaraarã k'inia iru p'anadak'ãri Cristopa oopi bik'a, ichita chik'inia para bait'ee. K'awáati na ewari Tachi Ak'õrepa jarapi bi waa wẽ-e pait'ee. Ma awara chi pedee bĩpa k'awada-e p'ani pedee waa ũrida-e pait'ee. Ichiaba k'ĩsia k'awaa p'anĩrãpa jarateepata auk'a waa wẽ-e pait'ee.

9 Mãgí jõma na ewari wẽ-e pait'ee, jõdait'ee perã. Tachia waide k'awada-e p'ani jõmaweda Tachi Ak'õrepa jarapi bi mĩik'aapa k'ĩsia k'awaa beerãpa jaratee p'ani.

10 Mamĩda Tachi Ak'õrepa k'ĩsia iru bi jõmaweda oo aupak'ãri, waa k'awa k'iniada-e p'anadait'ee irua jarapi bi mĩik'aapa k'ĩsia k'awaa beerãpa jaratee p'ani, jõmaweda Cristok'a k'awadait'ee perã.

11 Warra weda mi pedeeji mĩik'aapa k'ĩsia iru baji ne-inaa ooit'ee warrarãpa oopatak'a. Mamĩda chona pak'ãri, oo amaaji mãgee warra weda ne-inaa oopata.

12 Na p'ek'au eujãde p'ani misa, jĩp'a espejo k'ĩra t'awaa bide ak'i p'anik'a bi, jõmaweda Tachi Ak'õrepa k'ĩsia iru bi k'awada-e p'anadairã.

Mamĩda Cristo ome p'ananadak'ãri, jõmaweda k'awadait'ee Cristopa k'awa bik'a, k'awadait'ee perã Tachi Ak'õrepa tachi k'awa bik'a.

¹³ Maperã ichita ijãadaipia bi Tachi Ak'õrepa oopari ichia jara bik'a. Ichita ijãadaipia bi Tachi Ak'õrepa tachimaa teeit'ee ne-inaa jõmaweda ichia k'ĩsia iru bi tachi-it'ee, it'ari panadak'ãri. Ichita awaraarã k'inia iru p'anadaipia bi Tachi Ak'õrepa k'inia iru baparik'a. Tachi Ak'õre-it'ee ma jarada õpeedepema chi t'ẽe jara aupadata pipiara bi jõma apema jara aupada k'ãyaara.

14

Chik'aripa p'anadaipia bi Tachi Ak'õre Jaurepa oopi bik'a oodait'ee

¹ Mãga pipiara bairã Tachi Ak'õre-it'ee, parãpa awaraarã k'inia iru p'anadaipia bi. Mãga oo p'ani misa, iididaipia bi Tachi Ak'õre Jaurepa parãmaa jarapimerã Tachi Ak'õrepa jarapi bik'a.

² Ma k'ãyaara, iidiruta pirã Tachi Ak'õre Jaurepa parã pedeepimerã k'awada-e p'ani pedeede, mãgá jarateedak'ãri, chi ũrirutaarãpa k'awada-e p'anadai mãgí jarateeruta. Tachi Ak'õrepapai k'await'ee.

³ Jõdee Tachi Ak'õre Jaurepa jarapiru pirã irua jarapi bik'a, chi ũrirutaarãpa pia k'awaadait'ee, ãchi pedeede ũridait'ee perã. Mapa oo k'inia p'anadait'ee mãgí jarateeruta jara p'anik'a mãik'aapa t'ãri o-ĩa p'anadait'ee oodak'ãri Cristopa oopi bik'a.

⁴ Chi pedee bipa ichia k'awa-e bi pedeede pia oo bi ichi-it'ee. Mamĩda Tachi Ak'õrepa jarapi bik'a jaraparipa apemaarã ijãapataarã k'aripapari.

5 Parã jõmaweda pedeeda paara k'awada-e p'ani pedeede, pia bak'aji. Mamĩda pipiara bi Tachi Ak'õrepa jarapi bik'a jaradamerã, wẽ-e pirã apidaapa mãgí pedee ũridamerã mãik'aapa k'awapidamerã apema ijãapataarãmaa.

6 Mapa ñpemaarã, mi parãmaa wãru pirã jarateede k'awa-e bi pedeede, parã k'aripa-e pait'ee. Jõdee wãru pirã Tachi Ak'õrepa jarapi bik'a jarade maa-e pirã Cristo ũraa jarateeru pirã, mágá k'awaadai Cristopa oopi k'inia bi.

7 Parãpa k'awa p'ani siru chaa k'awaa beerãpa mãik'aapa arpa chaa k'awaa beerãpa pia chaapata chi ũri p'aniirãpa k'awaadamerã chisãgí sirupa chaada mãik'aapa chisãgí arpapa chaada. Mamĩda pia chaa k'awa-e bipa chaak'ãri, k'achia ũridai mãik'aapa pia k'awada-e pai chisãgí siru wa chisãgí arpa.

8 Ichiaba soldaorãpa trompeta atepata jura chõonadak'ãri. Chi chaa k'awaa bipa chaapari soldaorã chõode uchiadamerã. Mamĩda mãgípa pia chaa-e pirã, soldaorã chõode uchiada-e pai, k'awada-e p'anadairã ãchia ũri p'ani k'ãata jara k'inia bi.

9 Mãga pik'a bi parã ome. K'awada-e p'ani pedeede pedee p'anadak'ãri, chi ũrirutaarãpa k'awada-e pai parãpa jaratee k'inia p'ani. Pipiara bak'aji pãchi ituaba pedeedap'edaa paara.

10 Wãara na p'ek'au eujãde eperãarã pedee chok'ara awara-awaraa pedee p'ani. Ma pedee pedeeapataarãpa pia k'awapata ãchi pedee ũridak'ãri.

11 Mamĩda mia mãgí pedee ũri-e bi pirã, k'ĩra

tewaraak'a bai māgí pedeevari ome, p'oyaa ũri-e bairã māgí pedee.

12 Māga bi parã ome ichiaba. Maperãpi iidi k'inia p'ani pirã Tachi Ak'õre Jaurepa parãmaa ne-inaa oopimerã, iididaipia bi ne-inaa k'aripadait'ee apemaarã ijãapataarã.

13 Mamĩda iidi k'inia p'ani pirã Ak'õrepa pedeevari k'awada-e p'ani pedee, mǎgara ichiaba iididaipia bi k'awapimerã k'ãata jara k'inia bi māgí pedee. Mǎgá awaraarãmaa jarateedai.

14 Mia it'aa t'ĩru pirã k'awa-e bi pedee, mi jaurepapai k'awa bi k'ãata jara k'inia bi, araa bapari perã Tachi Ak'õre Jaure ome. Mamĩda michi k'ĩsiade k'awa-e bi.

15 Mǎgara mia ¿sǎga ooima? Jaurepapai it'aa t'ĩit'ee mǎik'aapa k'ariit'ee mia k'awa-e bi pedee. Mamĩda ma k'ǎyaara pipiara it'aa t'ĩpariit'ee mǎik'aapa k'aripariit'ee mia k'awa bi pedee.

16 Pia pida mǎga ooru pirã, eperã pi ik'aawa su-ak'i bĩpa auk'a k'awaait'ee pia gracias jara bi mǎik'aapa k'ari bi. Mǎgá pi ome auk'a iru it'aa t'ĩi gracias jarait'ee Tachi Ak'õremaa.

17 Jõdee pia it'aa t'ĩru pirã k'awa-e bi pedee, pia bi mĩda Tachi Ak'õre k'ĩrapite, pi ik'aawa p'anĩrã maarepida k'aripa-e bi.

18 Tachi Ak'õre k'ĩrapite mi o-ĩa bi, mia parã k'ǎyaara pedee chok'araara pedeevari perã, mia k'awa-e bi pedee. Mǎga ooi Tachi Ak'õre Jaurepa mǎga oopipari perã.

19 Mamĩda apemaarã ijãapataarã ome bak'ãri it'aa t'ĩit'ee Tachi Ak'õremaa, mi-it'ee pipiara bi pedeeit'ee pedee joisomaapai arii p'anĩrã

pedeede, pedee diez mil pedeei k'ãyaara ãrapa k'awada-e p'ani pedeede.

²⁰ Maperã ñpemaarã, warra chak'eerãk'a k'ĩsianáati. Ærak'a p'ana k'inia p'ani pirã, p'anadaipia bi warra ewaa t'odak'a; audua-ee. Pia k'ĩsiatì chonaarãpa k'ĩsiapatak'a.

²¹ K'irãpãtì Tachi Ak'õre Æraa p'ãdade jara bi: 'Tachi Ak'õrepa jara bi: "Mia Israel pidaarãmaa pedeet'ee k'awada-e p'ani pedeede k'ĩra tewaraarã it'aideepa. Mamãda ma Israel pidaarãpa k'awa p'anadait'ee mĩda mia mãga oopi bi, at'ãri mi pedee ùri k'iniada-e p'anadait'ee." ' (Is 28.11-12)

²² Tachi Ak'õrepa mãga jarada perã, nãga k'awaadai. Ijãadak'aa beerãpa unuruta pijida Tachi Ak'õre Jaurepa parãmaa pedeepimaa bi pãchia k'awada-e p'ani pedeede, ma Israel pidaarãk'a ãrapa ùri k'iniada-e pait'ee. Jõdee ijãapataarãpa mãga unudak'ãri, ùridait'ee, k'awada-e p'ani mĩda k'ãata jara k'inia bi. Mamãda ma k'ãyaara parãpa jararuta pirã Tachi Ak'õrepa jarapi bik'a ãchi pedeede, audupiara ùri k'inia p'anadait'ee, ùridait'ee perã ãramaa Cristopa oopi k'inia bi. Mãga bi ijãadak'aa beerã ome ichiaba.

²³ K'ĩsiatì nãgide. Parã cheepurudak'ãri it'aa t'ĩdait'ee, parãdepema ùk'uru pedeemaa p'aneeruta pirã k'awada-e p'ani pedeede mãik'aapa mãga p'anide t'ĩuru pirã eperã ijãak'aa bi maa-e pirã Tachi Ak'õre Æraa waide k'awa-e bi, ichia k'ĩsiai parã jõmaweda k'ĩra k'awa-ee para bi.

²⁴ Jõdee eperã ijãak'aa bi maa-e pirã Ak'õre Æraa waide k'awa-e bi t'ĩuru pirã Tachi Ak'õrepa jarapi

bik'a jara p'anide, ũrii ichia p'ek'au k'achia oopari Tachi Ak'õre k'irapite.

²⁵ Maap'eda mǎgide k'ĩsiak'ãri, t'ãri p'uadarii mǎik'aapa ijãai, wa ijãa-e pai. Maap'eda bedabaidarii Tachi Ak'õremaa it'aa t'it'ee mǎik'aapa jarait'ee: "Wãara Tachi Ak'õre nama parã ome bapari."

Chip'edaidak'ãri, ne-inaa jõma k'ĩra jĩp'a oodaipia bi

²⁶ Mǎpai ĩpemaarã, nãga oodaipia bi chip'edaidak'ãri it'aa t'ĩdait'ee. Ũk'uruurãpa Ak'õre k'ari k'aridaipia bi. Awaraarãpa Cristo ũraa jarateedaipia bi maa-e pirã Tachi Ak'õrepa jarapi bik'a jaradaipia bi. Awaraarãpa k'awada-e p'ani pedeede pedeedaipia bi Tachi Ak'õre Jaurepa oopi bik'a. Awaraarãpa mǎgĩ pedee jara k'inia bi jõmaarãmaa k'awapidaipia bi Tachi Ak'õre Jaurepa oopi bik'a. Ma jõmaweda oodaipia bi ijãapataarã chik'aripa p'anadamerã.

²⁷ Ma k'awada-e p'ani pedeede pedeeapataarã pedeedaipia bi aba-abaa, omé maa-e pirã õpee pedee auparutamaa. Maap'eda mǎgĩ pedee k'awapataarãpa jõmaarãmaa k'awapidaipia bi ãrapa jaradap'edaa.

²⁸ Apida wẽ-e pirã mǎgĩ pedee k'awaapiit'ee k'ãata jara k'inia bi, mǎgara chi mǎgá pedee bi waa pedeeik'araa bi. Ma k'ãyaara ichi t'ãridepai pedeeipia bi ichi-it'ee mǎik'aapa Tachi Ak'õre-it'ee.

²⁹ Mǎgá ichiaba Tachi Ak'õrepa jarapi bik'a jara-pataarãpa pedee k'inia p'ani pirã, pedeedaipia bi aba-abaa, omé maa-e pirã õpee pedee auparutamaa. Apemaarãpa ũridaipia bi ãrapa jararuta,

k'awaadait'ee wāara Tachi Ak'õrepa jarapida wa mǎga-e.

³⁰ Abaapa Tachi Ak'õrepa jarapi bik'a jara bi misa, awaraapa pedee k'inia bi pirǎ jarapida awara, mǎgara ma naa pedee badapa chi t'ēepemamaa pedeeipiia bi.

³¹ Mǎga oo p'ani pirǎ, jōmaarǎ pedee k'inia p'anirǎ pedeedait'ee, apemaarǎ ijāpataarāpa k'awaadamerǎ jōmaweda Tachi Ak'õrepa āramaa jara k'inia bi.

³² Tachi Ak'õrepa jarapi bik'a jara bīpa pariatua pedeeik'araa bi. Jip'a pedeeipiia bi Tachi Ak'õre Jaurepa mǎga oopi bak'āri.

³³ Mǎga oodaipia bi Tachi Ak'õrepa ne-inaa pariatua oopik'aa perǎ. Oodaipia bi awaraa p'uurudepema ijāpataarāpa oopatak'a.

³⁴ Mapa ichiaba chip'edaidak'āri it'aa t'īdait'ee, wēraarǎ k'īup'ee p'anadaipia bi, jarateepataarǎ mǎik'aapa Tachi Ak'õrepa jarapi bik'a jarapataarǎ pedee p'ani misa, Tachi Ak'õre Ūraa p'ādade jara bairǎ āchi imik'īraarǎ jua ek'ari p'anapataadaipia bi.

³⁵ Mapa ārapa ne-inaa iidi k'inia p'ani pirǎ, iididaipia bi āchi imik'īramaa teeda panadak'āri. Pia-e bi pariatua pedeedamerǎ, awaraarǎ pedee p'ani misa.

³⁶ Auk'a k'īsiada-e p'ani pirǎ, k'irāpāti parāmaa ijāapii naaweda Tachi Ak'õrepa awaraarāmaa ijāapiji mǎik'aapa k'awapiji ichia oopi k'inia bi chip'edaidak'āri. Maperǎ k'īrak'aupai pāchia oo k'iniata oodai, Tachi Ak'õrepa k'awapida oodai k'āyaara.

³⁷ Apida k'ĩsia bi pirã ichiata Tachi Ak'õrepa jarapi bik'a jarapari, maa-e pirã ne-inaa awara oopari Tachi Ak'õre Jaurepa oopi bik'a, k'awaaipia bi Tachi Ak'õrepa mimaa jarapiji jõma na p'ãdade jara bi. Mapa oopia bi na ũraade jara bik'a.

³⁸ Mamĩda mǎgí eperãpa jara bi pirã mia na p'ã bide jarateemaa bi michi k'ĩsiadoopa, irua jara bi ũridaik'araa bi.

³⁹ Mǎpai ipemaarã, audupɪara iididaipia bi Tachi Ak'õre Jaurepa jarapimerã Ak'õrepa jara k'inia bi ijãapataarãmaa. Mǎga nide abaapa pedee k'inia bi pirã ichia k'awa-e bi pedeede, pedeenapáde adaik'araa bi.

⁴⁰ Mamĩda ne-inaa jõma oodaipia bi Tachi Ak'õrepa oopi bik'a, pariatua oodai k'ãyaara.

15

Jesucristo piup'eda, chok'ai p'irabaida

¹ Írá ipemaarã, k'irãpapiit'ee mia naaweda jarateeda; jõma Jesucristopa ooda tachi k'aripait'ee atuanaadamerã. Parãpa mǎgí jarateeda ijãajida; mǎgita at'ãri ijãa p'ani.

² Ma jarateeda k'aurepa Tachi Ak'õrepa parã o k'achiadeepa k'aripa ata wã. Mapa aide ijãapataadaipia bi. Mǎga-e pirã, pãchi k'inia ijãajida.

³ Ma jarateeda k'awaap'eda, mia parãmaa jarateeki, jarateeda pipɪara bairã. Nǎga bi: Cristo piuji tachia p'ek'au k'achia oopata wēpapiit'ee, Tachi Ak'õre Ũraa p'ãdade jara bik'a.

⁴ Ma piuda t'ēpai, mǎu te uriade iajida mǎik'aapa ewari õpeemaa chok'ai p'irabaiji, Tachi Ak'õre Ũraa p'ãdade jara bik'a.

⁵ Ma t'ēepai ichia unupiji Pedromaa, maap'eda chi apemaarã k'õp'ãyoorãmaa, ichi ome nīpap-atap'edaa na p'ek'au eujãde bi misa.

⁶ Ai t'ēepai unupiji quinientos audú see nībada ijāapataarãmaa. Māgīdepema ũk'urupai jai-idaa p'ani, mamīda chi apemaarã at'ãri chok'ai p'ani.

⁷ Ai t'ēepai unupiji Santiagomaa. Maap'eda unupiji ichia ũraa jarateede pēida eperāarãmaa.

⁸ Maap'eda, jōmaarã t'ēe, mīmaa ichiaba unupiji, ai naaweda mi k'achia baji mīda.

⁹ Māga ooji mi jōmaweda apemaarã pēida k'āyaara ek'ariara bi mīda. Mi-it'ee piara bak'aji Tachi Ak'õrepa mi jiri'tera-e pada paara, mia Cristode ijāapataarã miapipachi perã.

¹⁰ Mamīda Tachi Ak'õre t'ãri pia bapari perã, mi k'aripaji. Maperã mi apemaarã pēida k'āyaara mimiara bapari. Mimiak'aa mīchi k'ĩradoopa. Jīp'a Tachi Ak'õrépata mīmaa nāgī mimia oopipari Cristo-it'ee.

¹¹ Mi āra k'āyaara audú mimiapari mīda, taipa auk'a jarateepata, ma-it'ee Cristopa tai pēida perã. Māgī jarateedata parāpa ijāajida.

Tachi Ak'õrepa piudap'edaarã chok'ai p'irabaipipari

¹² Parāpa k'awa p'ani Tachi Ak'õrepa Cristo chok'ai p'irabaipiji, taipa māga jarateedap'edaa perã. Māga bita, ¿sāap'eda ũk'uru parã t'ãide p'anīrāpa jara p'anīma eperāarã piudap'eda chok'ai p'irabaidak'aa?

¹³ ¡K'ĩsīati! Tachi Ak'õrepa eperāarã p'oyaa p'irabaipi-e pirã, māgara Cristo jīda p'irabaipi-e pak'aji.

14 Māgara páripì taipa jarateepata Jesucristopa ooda eperāarā k'aripait'ee. Parāpa pida pāchi k'inia irude ijāa p'ani.

15 Ma awara māirāpa jara p'ani wāara pirā, tai seewa-idaa p'ani, parāmaa jarateedap'edaa perā Tachi Ak'ōrepa Cristo p'irabaipiji.

16 Māirāpa k'isia p'anik'a Tachi Ak'ōrepa eperāarā p'oyaa p'irabaipi-e pirā, māgara Cristo jida p'oyaa p'irabaipi-e pak'aji. Māgara Cristo at'āri piu bak'aji.

17 Ma awara Tachi Ak'ōrepa Cristo p'irabaipi-e paji pirā, māgara parāpa páripì ijāa p'ani Cristo pi-uda k'aurepa Tachi Ak'ōrepa pāchia p'ek'au k'achia oopata wēpapii.

18 Māgara awaraa Cristode ijāapataarā jai-idaadap'edaarā auk'a atuak'ajida.

19 Ma jōma wāara pirā māik'aapa na p'ek'au eujādepai Cristode ijāa p'ani pirā, itachi jōmaarā k'āyaara chupiriara p'ani!

20 Mamīda māga-e. ¡Tachi Ak'ōrepa wāara Cristo chok'ai p'irabaipiji! Cristo naapiara ichita chok'ai bapariit'ee, piup'eda māik'aapa p'irabaip'eda. Ma awara Tachi Ak'ōrepa māga ooda perā Cristo ome, k'awa p'ani tachi jida ichiaba chok'ai p'irabaipiit'ee, Cristode ijāapata perā.

21 K'isiadāma nāgide. Eperāpa k'achia ooda k'aurepa, na p'ek'au eujādepemaarā jōmaweda piu-pata. Jōdee Tachi Ak'ōrepa awaraa eperā chok'ai p'irabaipida k'aurepa, jōmaweda irude ijāapataarā auk'a chok'ai p'irabaipiit'ee.

22 Pia jarait'eera, Adán k'aurepa jōmaarāta piupata. Jōdee Cristo k'aurepa jōmaweda

irude ijāapataarā jai-idaadap'eda, chok'ai p'irabaidait'ee.

²³ Mamīda p'irabaidait'ee Tachi Ak'ōrepa k'īsia iru bik'a. Cristo naap̄ara p'irabaipiji. Maap'eda Cristo cheru ewate irude ijāapataarā auk'a p'irabaipiit'ee.

²⁴ Ma t'ēepai na p'ek'au eujā jōit'ee. Cristopa netuaraarā māik'aapa Tachi Ak'ōre k'īra unuamaa iru p'anīrā, chi na p'ek'au eujādepema poro waibiarā jōmaweda p'oyaak'āri, māgīrā ichi Ak'ōre jua ek'ari biit'ee.

²⁵ Māga pait'ee Cristo na eujā poro waibia pait'ee perā, Tachi Ak'ōre k'īra unuamaa iru p'anīrā jōma birumaa ichi Ak'ōre jua ek'ari.

²⁶ Māgá ook'āripi, eperāarā waa piuda-e pait'ee.

²⁷ K'awa p'ani Cristota na p'ek'au eujā poro waibia, Tachi Ak'ōrepa ichi ūraa p'ādade jara bairā: 'Ne-inaa jōmaweda pi jua ek'ari biji: eperāarā, angeleerā māik'aapa netuaraarā paara.' (*Sal 8.6*)

Tachi Ak'ōre aupaita Cristo jua ek'ari ba-e.

²⁸ Māgá Tachi Ak'ōre k'īra unuamaa iru p'anīrā p'oyaap'eda, Tachi Ak'ōre Warrapa ooit'ee ichi Ak'ōrepa oodak'a ichi ome, nejōmaata iru jua ek'ari bik'āri. Irua nejōmaata biit'ee ichi Ak'ōre jua ek'ari, ichi k'ap'ia paara, Tachi Ak'ōre jōmaarā k'āyaara waibiarā beemerā.

²⁹ Ichiaba nāga k'awa p'ani Cristode ijāapataarā jai-idaadap'eda, chok'ai p'irabaidait'ee. P'irabaida-e pirā, ḡsāap'eda eperāarā ūk'uruurāpa poro choopipatama ijāapataarā jai-idaadap'edaarā pari, chi araada-e padap'edaarā poro choopidait'ee jai-idaadai naaweda? ¡Māgí jai-

idaadap'edaarã p'irabaida-e pirã, páripì ãra pari poro choopipata!

³⁰ Ma awara ijãapataarã p'irabaida-e pirã, ¿sãap'eda tai jarateede wãpatama, chi wãrutamaa tai k'ïra unuamaa iru p'ani mïda?

³¹ Wãara ewari chaa mi peedait'ee iru p'ani, jarateepari perã Cristopa ooda jõmaarã k'aripait'ee. Mamïda wãara mi o-ïa bi k'awa bairã parãpa Jesu-cristode ijãa p'ani.

³² Ma awara Cristode ijãapataarã p'irabaida-e pirã, páripì mi perã piuji Éfeso p'uurudepemaarã juapa. Mãgïrã ne-animalaarã k'achiarãk'api p'ani. Wãara chok'ai p'irabaida-e pirã, mãgara p'anadãma nãgï jarapatak'a:

'Nek'odãma, ne-inaa todãma mãik'aapa tachia oo k'iniata oodãma, taarã-e perã jõdait'ee.' (Is 22.13)

³³ ¡Mãga-e! Apidaamaa k'ũrapináati. Wãara jara p'ani nãga jaradak'ãri: "K'õp'ãyo meraa bi pirã k'achia oopataarã ome, auk'a oodai."

³⁴ ¡Pia k'ïsíati mãik'aapa ak'íti k'ïsia k'awaa pik'a p'aniirã parã t'ãide! P'ek'au k'achia oonáati ãchia oo p'anik'a jaradak'ãri Cristode ijãapataarã p'irabaida-e pait'ee. ¡Mãga jaratee p'aniirãpa waide Cristode ijãada-e p'ani! Mia mãga jara bi parã k'ïra nejasiapiit'ee.

*Sãga Tachi Ak'õrepa piudap'edaarã
p'irabaipiit'ee
(2 Co 5.1-5)*

³⁵ ¿Nãga iidi k'inia p'ani-ek'ã? "¿Sãga Tachi Ak'õrepa piudap'edaarã p'irabaipiit'eema? ¿Sãga baima chi k'ap'ia p'irabaida?"

36 Wãara mãga iidi k'inia p'aní k'ĩsia k'awada-e p'anadairã. ¿Parãpa nãgí k'awada-e p'aník'ã? Trigo tau maa-e pirã awaraa net'atau uudak'ãri, eujãde beraudaipari, t'ono wãru misa.

37 Chi k'arra uudak'aa. Jĩp'a chi tauta uupata, trigodee wa awaraa net'ataudee.

38 Mãgí uup'eda, Tachi Ak'õrepa t'onopipari trigo k'arra wa ne-inaa awaraa, ichia k'ĩsia iru badak'a net'atau k'ĩra t'ãdoo ewaa ook'ãri.

39 Mãga ooji awaraa ne-inaa chok'ai bee ome ichiaba. Ichia k'ĩsia iru badak'a k'ap'ia k'ĩra t'ãdoo ooji eperãarãde, ne-animalaarãde, ipanaarãde mãik'aapa chik'ode, mãgá ãchi k'ap'ia awara-awaraa iru p'anadamerã.

40 Ichiaba biji ne-inaa pajãde ichia k'ĩsia iru badak'a, na p'ek'au eujãdepema ne-inaa awara. Mãgí chaachaa ichi k'ĩra wãree biji. Mamĩda auk'a bi-e paji.

41 Ma k'ĩra wãree awara-awaraa biji nãgá: ak'õrejĩru urua awara bi atane ñdaa ome mãik'aapa atane ñdaa lucero ñdaa ome awara bi. Ichiaba lucero chaa urua awara bee.

42 Mãgá Tachi Ak'õrepa ne-inaa awara-awaraa oodak'a na eujãdepema mãik'aapa pajãdepema, mãga pik'a ichiaba awara ooit'ee eperã piuda k'ap'ia chok'ai p'irabaipik'ãri. Piuda k'ap'ia ñadak'ãri, mik'iadaipari. Jõdee chok'ai p'irabaida k'ap'ia waa piuk'aa.

43 Ma awara mãgí piuda k'ap'ia k'achia bapari mik'iadaipari perã. Jõdee chi chok'ai p'irabaida k'ap'ia k'ĩra wãree bait'ee. Piuda k'ap'ia p'oyaa mimik'ak'aa. Jõdee chok'ai p'irabaida k'ap'ia

ne-inaa k'ĩra t'ãdoo ooit'ee, Cristopa chok'ai p'irabaida t'ëe oodak'a.

⁴⁴ Eperãpa k'ap'ia iru bairã na p'ek'au eujãde bi misa, mãgara ichiaba k'ap'ia iru bait'ee Ak'õre truade. Na eujãdepema k'ap'ia piuk'ãri, iapata mik'iadaimerã. Mamĩda t'ëepai Tachi Ak'õrepa p'irabaipik'ãri, it'aripema k'ap'ia papiit'ee.

⁴⁵ Tachi Ak'õre Ûraa p'ãdade jara bi:

'Tachi Ak'õrepa eperã ook'ãri, iru k'ĩde jãrap'uaji chok'ai beemerã.' *(Gn 2.7)*

Ma eperã Adán paji. Mamĩda Cristo jida t'ĩjarapata Adán chi t'ëepema, Tachi Ak'õrepa ichiaba iru chok'ai p'irabaipida perã ichi truade ichita bapariimerã. Ma awara Tachi Ak'õrepa Cristo biji irude ijãapataarã chok'ai p'anapipariimerã.

⁴⁶ Tachi k'ap'ia naapema Adán k'ap'iak'a bi, na p'ek'au eujãdepema perã. Jõdee tachi t'ëepema k'ap'ia bait'ee chi t'ëepema Adán apata k'ap'iak'a, Ak'õre truadepema perã.

⁴⁷ Chi naapema Adán yoorodee ooda paji. Mapa na p'ek'au eujãdepema paji. Jõdee chi t'ëepema Adán it'aripema paji. Mata cheji na p'ek'au eujãdee.

⁴⁸ Na p'ek'au eujãdepemaarãpa k'ap'ia iru p'ani naapema Adanpa iru badak'a, irudeepa uchi-adap'edaa perã. Jõdee it'aa wãrutaarãpa k'ap'ia iru p'anadait'ee Cristopa iru bik'a, ichideerã perã.

⁴⁹ Mãgá na eujãdepema k'ap'iade p'ani misa, Adán bapatak'a p'anapata. Mamĩda it'aripema k'ap'iade p'anadak'ãri, Cristo baparik'a p'anapataadait'ee.

⁵⁰ Ma jõma jara aupadade k'ĩsiadak'ãri, parãpa k'awaadaipia bi na p'ek'au eujãdepema k'ap'ia

p'oyaa t'ĩuk'aa Tachi Ak'õre eujãde, ne-inaa mik'iadaipari mama t'ĩuk'aa perã.

⁵¹ Mamĩda ũrĩti, mia jarait'ee perã ne-inaa Tachi Ak'õrepa eperãarãmaa waide jara-e bi. Ijãapataarã jõmaweda piuda-e pait'ee. Mamĩda wãara jõmaweda k'ap'ia awara padait'ee.

⁵² Mãgá padait'ee isapai, tachi tau p'inaru jĩak'aata. Mãga nide it'aripema trompeta jĩwaak'ãri, Cristode ijãa jai-idaadap'edaarã jõmaweda p'irabaidait'ee mãik'aapa tachi chok'ai p'anĩrã k'ap'ia jida awara pak'oodaridait'ee.

⁵³ Mãga pait'ee na p'ek'au eujãdepema k'ap'ia p'oyaa wã-e perã Tachi Ak'õre eujãdee. Mapa mãgá it'aripema k'ap'iata padait'ee, aide uchiadamerã iru eujãde.

⁵⁴ Mãgá tachi k'ap'ia jõmaweda it'aripema k'ap'ia padaik'ãri, unudait'ee Tachi Ak'õre Ũraa p'ãdade jara bik'a:

'Tachi Ak'õrepa jõmaweda p'oyaaaji. Maperãpi ichia chok'ai p'irabaipidaarã waa piuda-e pait'ee.' *(Is 25.8)*

⁵⁵ Mapa ijãapataarãpa jõmaweda jaradaipia bi Tachi Ak'õre Ũraa p'ãdade jara bik'a:

'Tachi Ak'õre jõmaarã k'ãyaara waibiara bi, tachi chok'ai p'anapipari perã, waa piuda-e pait'ee. Ma awara waa k'ĩsia p'ua k'ĩsiadak'aa, waaweeda-e p'anadairã miadait'ee tachia p'ek'au k'achia oopata k'aurepa.' *(Os 13.14)*

⁵⁶ Mãga jaradaipia bi eperãarã piupata perã ãchia p'ek'au k'achia oopata k'aurepa. K'awa p'ani

jõmaweda p'ek'au k'achia eperãarãpa oopata, ma jõma jara bairã Tachi Ak'õre Ûraa Moisemaa p'ãpidade.

⁵⁷ Mamĩda Jesucristo piuda perã tachia p'ek'au k'achia oopata wẽpapiit'ee, mãik'aapa chok'ai p'irabaida perã, tachi o k'achiadeepa k'aripa ataji. Maperã it'aa t'ĩpata Tachi Ak'õremaa gracias jaradait'ee. ¡Iruta jõmaarã k'ãyaara waibiara bi, irua k'ĩsia iru bada perã Tachi Waibia Jesucristo pẽiit'ee tachi k'aripade!

⁵⁸ Maperã ãpemaarã k'iniarã, mia jarateeda ijãa p'anapatãati. Ma awara ichita óoti Cristopa oopi bik'a, k'awa p'anadairã mãga oodak'ãri, pari neinaa ooda-e pait'ee.

16

Ijãapataarã-it'ee p'arat'a p'edap'edaa

¹ Írá jarait'ee sãga p'arat'a p'edaipia bi p'ẽidait'ee apemaarã ijãapataarã-it'ee. Óoti mia jaradak'a Galacia eujãdepema ijãapataarãmaa, ãchi it'aa t'ĩpata chaa.

² Tomia ewate parã chaachaa p'arat'a awara bidaipia bi, parãmaa p'aa p'anidepema. P'arat'a waibia p'aa p'ani p'irã, waibia awara b'iti. Mamĩda mak'iarã p'aada-e p'ani p'irã, ma jãak'a awara bidai. Mãga oodaipia bi ewaa p'arat'a p'enaadamerã mi panak'ãri.

³ Ma awara jirit'eradaipia bi parã t'ãidepemaarã, ma p'arat'a p'edap'edaa ateedamerã Jerusalendee. Mãpai mi parãmãi panak'ãri, k'art'a p'ã p'ẽiit'ee ãra ome Jerusalendee, ijãapataarãpa k'awaadamerã wãara mãirã parãpa jirit'erada.

4 Māga-e pirā, mi jida auk'a āra ome wāi.

Pablopa k'isia iru bada Corinto p'uurudee wāit'ee

5 Mi wāit'ee Macedonia eujādee ijāapataarā ak'ide. Ma t'ēpai wā k'inia bi Corinto p'uurudee parā ak'ide.

6 K'isia bi taarāit'ee parā ome p'usa t'ojara wāyaarumaa. Māga ooru pirā, k'inia bi mi k'aripadamerā jāmāik'aapa wāk'āri.

7 Arak'atia wiibai k'inia-e parāmāi. Jīp'a taarā bee k'inia bi, Tachi Ak'ōrepa māga k'inia bi pirā.

8 Nāgaweda k'isia bi beeit'ee nama Éfeso p'uurude Pentecostés fiesta parumaa.

9 Nama at'āri bee k'inia bi nāpema chok'araarāpa mia jaratee bi ūri k'inia p'anadairā. Mapa jaratee nībait'ee, chok'ara Tachi Ak'ōre k'ira unuamaa iru p'anīrāpa māgā jarateepi k'iniada-e p'ani mīda.

10 Timoteo panak'āri parāmaa, auteebai pedéeti iru ome, iru mi ome auk'a Cristo mimia oopari perā.

11 Iru oo iru p'anadaik'araa bi. Ma k'āyaara pia ak'i p'anāti māik'aapa k'aripāti, o'ia chemerā apemaarā ijāapataarā ome mia nimaa bimāi.

12 Parāpa iidi pëijida sāapai tachi ipema Cristo k'aurepa Apolo parāmaa wāit'ee. Mia jaraji wāmerā apemaarā ome parā ak'ide. Mamīda na wādade wā k'inia-e paji. Jua pari bak'ārita wāit'ee.

Pablopa jarada na k'art'a p'ā auparude

13 K'irak'aupai apidaapa parā k'achiade baaipidai. Cristode ijāapatāati mia jarateedak'a māik'aapa oopatāati Cristopa oopi bik'a. Pia choopatāati Cristode ijāa p'anide.

14 Ma awara parãpa oo p'ani jômaweda chik'inia oopatáati.

15 K'awa p'ani Estéfanos ichi te pidaarã ome naapiara Cristode ijãajida Acaya eujãde. Árapa apemaarã ijãapataarã k'aripapata.

16 Maperã mia k'inia bi ãra pãchi poroorãk'a iru p'anadamerã mãik'aapa mágá ichiaba iru p'anadamerã apemaarã ijãapataarã ãrak'a k'aripapata.

17 Mi o-ĩa bi chedap'edaa perã Estéfanos, Fortunato mãik'aapa Acaico mi k'aripade parã pari.

18 Árapa mi o-ĩapi chejida parã o-ĩapidap'edaak'a. Mapa ãra pari Tachi Ak'õremaa gracias teedáma.

19 Ásia eujãdepema ijãapataarãpa salude pëiruta. Ichiaba salude pëiruta Aquilapa Priscila ome mãik'aapa ãchi tede cheepurupata ijãapataarãpa.

20 Nãpema ijãapataarãpa auk'a salude pëiruta. Parã saludaadak'ãri, chik'inia saludaapatáati.

21 Mi, Pablopã nãgí salude p'ãru mĩchi juadoopa.

22 Eperã apidaapa Jesucristo k'iniada-e p'ani pirã, Tachi Ak'õrepa mágí k'achia ooit'ee. Tachi Waibia Cristo, ¡isapai chéji!

23 Mia k'inia bi Tachi Waibia Jesucristopa parã pia ak'i bapariimerã.

24 Parã jômaweda k'inia iru bi Jesucristodeerã perã.

Mãgapai paji.

Tachi ak'õre pedee
New Testament in Epena (CO:sja:Epena)

copyright © 2005 Wycliffe Bible Translators, Inc.

Language: Epena

Translation by: Wycliffe Bible Translators, Inc.

Epena

sja

Colombia

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Epena

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 18 Apr 2025 from source files dated 29 Jan 2022

1e08d4cb-71aa-5440-b08f-b522fabb6441